


唐詩英華

十五之十八



五	五	二	六	類
六	四	函	號	漢書問

三	五	八	函	類
三	六	冊	號	漢書

內閣文庫	
番號	漢 5526
冊數	6 (5)
函號	358 16



唐詩英華卷十五目錄

友人

張綱孫
陸世鑿

宋存標
吳炎
叅輯

淺草文庫

晚唐五

桂

李頻 十首

劉得仁 三首

趙光遠 一首

方干 三十一首

伊璠 一首

武瓘 一首

袁皓 一首

翁綬 八首

高駢 三首

顧雲 一首

盧渥 一首

李昌符 三首

司空圖 十六首

聶夷中 一首

唐詩英華卷十五目錄

周繇 一首

許棠 六首

楊夔 三首

張喬 三首

胡曾 九首

唐彥謙 十四首

滕倪 一首

章碣 九首

沈彬 九首

唐詩英華卷十五目錄終

唐詩英華卷十五

吳江顧有孝茂倫編

晚唐五

李頻

新唐書云字德新睦州壽昌人少秀悟逮長廬
西山多所記覽其屬辭于詩尤長與里人方干
善給事中姚合名為詩士多歸重頻走千里丐
其品合大加獎挹以女妻之大中八年擢進士
第調祕書郎為南陵主簿判入等再遷武功令
俄擢侍御史守法不阿徇遷累都官員外郎表
丐建州刺史既至以禮法治下更布條教時朝

政亂盜興相椎斃而建賴頻以安卒於官父老
為立廟黎山歲祠之○藝文志云詩一卷

樂遊原春望

五陵佳氣晚氤集作氤集作霸業雄圖勢自分秦地山河連

紫塞漢家宮殿入青雲未央樹色春中見長樂鐘

聲月下聞無那楊花起愁思滿天飄落雪紛紛

湘中鼓吹作送友人

中流欲暮見湘烟岫葦無窮接楚天集作去雁遠衝雲

夢雪一作離人獨上洞庭船風波盡日依山轉星漢通

宵向水縣集作零落梅花過殘臘故園歸去集作又集

及新年

送邊將

防秋戎馬恐來奔詔發將軍出雁門遙領短兵登隴首

獨橫長劔向河源旌旗集作落日黃雲動鼓角集作陰

風白艸翻若使集作干戈更深入應聞收得到崑崙

和友人下第北遊感懷

聖代為儒可致身誰知又別五陵春青門獨出空歸鳥

紫陌相逢盡醉人江島去尋垂釣遠塞山來見舉頭頻

且須共漉邊城酒何必陶家有白綸

鄂州頭陀寺上方

高寺上方無不見天涯行客思迢迢西江帆挂東風急

夏口城銜一作楚塞遙沙渚漁歸多濕網桑林蠶後盡

唐詩苑英華卷五
空條感時嘆物尋僧話惟向禪心得寂寥

題張司馬別墅

庭前樹盡手中栽先後花分幾番開巢鳥戀雛驚不起
野人思酒去還來自拋官與青山近誰訝一作身爲白
髮一作日催門外尋常行樂處重重履迹在莓苔

五月一日蒙替本官不得隨例入闕感懷獻

送相公

五月傾朝謁紫宸一朝無分在清塵含香已去星郎位
衣錦惟思婺女隣折獄也曾爲俗吏勸農元本是耕人
知將何事酬公道只養生靈似養身按頻令武功時民
其橫類假借不敢繩以法頻至有神策士尚君慶通
賦六年不送睥然出入閭里頻密臆此伍與競君慶

叩縣廷質頻卽械送獄盡條宿惡請於并殺之督所
負無少貸豪猾大驚屏息奉法縣大治有六門堰者
厥廢百五十年方歲饑頻發官膏庸民浚渠按故道
斷水溉田穀以大稔所以有折獄勸農之句此詩之
作應在未擢侍
御史之時也

太和公主還宮

按唐書憲宗定安公主始封
太和下嫁回鶻崇德可汗會

昌三年
來歸

天驕發使犯邊塵漢將推功遂奪親離亂應無初去貌
死生難有却回身禁花半老曾攀樹宮女多非舊識人
重上鳳樓追故事幾多愁思向青春

黃雀行

欲竊高倉集御河翩翩疑渡畏秋波朱宮晚樹侵鶯語
畫閣香簾奪燕窠疎葉暗棲寒露重空城饑噪暮烟多

誰令不解高飛去破宅荒庭有網羅

春日思歸

春情不斷若連環一夕思歸鬢欲斑壯志未酬三尺劍
故鄉空隔萬重山音書斷絕干戈後親友相逢夢寐間
却羨浮雲與飛鳥因風吹去又吹還

劉得仁

全唐詩話云得仁貴主之子自開成至大中三
朝昆弟皆歷貴仕而得仁苦于詩出入舉場三
十年卒無成自述曰外家雖是帝當路且無親
又云外族帝王是中朝親故稀翻令浮議者不
許九霄飛既終詩人競爲詩弔之○藝文志云

詩一卷

奉和翰林丁侍郎禁署早春晴望

御林聞有早鶯聲玉檻春香九陌晴寒著霽雲歸紫閣
暖浮佳氣動皇城宮池日到冰初解輦路風吹艸欲生
鴛侶此時皆賦咏商山雪在思尤清

贈敬睦助教

到來常聽說清虛手把玄元七字書仙籍不知名姓有
道情惟見往來疎已能絕粒無饑色早晚休官買隱居
便欲去隨爲弟子片雲孤鶴肯相於

又

街西靜觀求居處不到權門到寺頻禁掖人知連狀薦

國庠官滿一家貧清儀都道一作稱是蓬瀛客直氣堪爲諫
諍臣自顧無成年漸長報恩唯願殺微身

趙光遠

高棟云大中時人

題北里妓人壁

魚鑰獸環斜掩門萋萋芳艸憶王孫醉凭青瑣窺韓壽
閒擲金梭惱謝鯤不夜珠光連玉匣辟寒釵影落瑤尊
欲知腸斷相思處役盡江淹別後魂

方干

孫邵元英先生傳云先生新定人字雄飛章八
元卽先生外王父也廣明中和間爲律詩江之

南未有及者始謁錢唐守姚公合公視其貌陋
初甚侮之坐定覽卷駭目變容而嘆之先生一
舉不得志遂遯于會稽漁于鑑湖與鄭仁規李
頻陶詳爲三益友弟子洪農楊弇釋子居遠及
卒弇編其詩請舍人王贊爲之序贊序云張祐
升杜甫之堂方干入錢起之室云○紀事云干
爲人質野每見人設三拜曰禮數有三識者呼
爲方三拜爲人唇缺連應十餘舉遂歸鏡湖後
十數年遇醫補唇年已老矣鏡湖人號曰補唇
先生又云唐末宰臣張文蔚中書舍人封舜卿
奏名儒不遇者五人請賜一官以慰其魂干其

唐詩苑英華卷五
一也○藝文志云詩集十卷

題烏龍山禪居

曙後一作暑夜月華猶冷濕自知坐臥逼天星一作星宮晨雞未
暇鳴山底早日先來照屋東人世驅馳方丈內乘波搖
動一盃中伴師長住應難住歸去仍須入俗籠

寄靈武胡常侍

青雲直上路初通已在明君倚注中欲遣爲霖安九有
先令作相贊東宮自從忠讜承天睠更用文篇續國風
最是何人感恩德謝敷星下釣魚翁

贈信州高員外

溪勢盤迴繞郡流饒陽春色滿溪樓豈唯啼鳥催人醉

更有繁花笑客愁蹇拙命中迷直道仁慈風裏駐扁舟
膺門若感深恩去終殺微軀未足一作是酬

自縉雲赴郡溪流百里輕棹一發曾不崇朝

叙事四韻寄獻段郎中

激箭溪湍勢莫憑飄然一葉若爲乘仰瞻青壁開天罅
斗轉寒灣避石稜巢鳥夜驚離島樹啼猿晝怯下巖藤
此中明月尋知色恐似龍門不易登

書桃花陽周處士壁

醉吟雪一作雲月思深苦思苦神勞華一作新髮生自學古
賢脩靜節唯應野鶴識高情細泉出石飛難盡孤燭和
雲濕不暝何事嬾於嵇叔夜更無書札荅公卿

題桐廬謝逸人江居

清世一作少小高眠無一事五侯勳盛欲如何湖邊倚杖一作
竹寒吟苦石上橫琴夜醉多鳥自樹梢隨果落入從窻
外卸帆過由來朝市為真隱可要棲身向薜蘿

哭秘書姚少監

寒空此夜落文星星落文留萬古名入室幾人成弟子
為儒是處哭先生家無諫草逢明代國有遺篇續正聲
曉向平原陳葬禮悲風吹雨濕銘旌

贈華陰隱者

少微夜夜當仙掌更有何人在此居花月舊應一作交看
浴鶴松蘿本自伴刪書素琴醉太經宵枕衰髮寒一作開

來向日梳故國多年歸未遂因逢此地憶吾廬

贈處州段郎中

幸見仙才領郡初郡城孤峭似仙居杉蘿色裏遊亭榭
一作登臺閣瀑布聲中閱簿書德重自將天子合情高元與
世人疎寒潭是處清連底賓席何心望食魚

書法華寺上方禪壁

砌下松巔有鶴棲孤猿亦在鶴邊啼臥聞雷雨歸巖早
坐見星辰去地低一逕穿緣應就郭千花掩映似無溪
是非生死多憂惱此日蒙師為破迷

書吳道隱林亭

薜榭莎亭蘿篠陰依稀氣象似山林橘枝亞路黃苞重

唐詩苑卷三
井脉牽湖碧，甃深稚子遮。門留熟客驚，蟬入座避遊。
作一
饑禽四鄰不見孤，高處翻笑騰騰只醉吟。

哭喻鳧先輩

日夜役神多損壽，先生下世未中年。撰碑縱託登龍伴，
營奠應支賣鶴錢。孤壟陰風吹細艸，空窓濕氣漬殘編。
人間別更無冤事，到此誰能與問天。

湖北有茅齋，湖西有松島。輕棹往返，頗諧素心。因成四韻。

湖北湖西往復還，朝昏只處自由間。暑天移榻就深竹，
月夜乘舟歸淺山。遶砌紫鱗欹枕釣，垂簷野果隔窓攀。
古賢暮齒方如此，多笑愚儒鬢未斑。

山中言事

欹枕亦吟行亦醉，臥吟行醉更何營。貧來猶有故琴在，
老去不過新髮生。山鳥踏枝紅果落，家僮引釣白魚驚。
潛夫自有孤雲侶，可要王侯知姓名。

贈式上人

縱居輦角喧闐處，亦共雲溪邃僻同。萬慮全離方寸內，
一生多在五言中。芟荷葉上難停雨，松檜枝間自有風。
莫笑旅人終日醉，吾將大醉與禪通。

山中言事

日與村家事漸同，燒松掇茗學鄰翁。池塘月撼芙蓉浪，
窓戶涼生薜荔風。書幌晝昏嵐氣裏，巢枝夜折雪聲中。

唐詩集卷之三
山陰釣叟無知己窺鏡擣多鬢欲空

題陶詳枋書陽羨隱居

芸香署裏從容步陽羨山中嘯傲情竿底紫鱗輸釣伴
花邊白犬吠流鶯長潭五月含冰氣孤檜中宵學一作帶
雨聲更泛扁舟應未得鴟夷棄相始垂名

再題路支使南亭

行處避松兼礙石卽須門徑落斜開愛邀舊友看漁釣
貪聽新禽駐酒盃樹影不隨明月去溪聲常送落花來
睡時分得江淹夢五色毫端弄逸才

聽段處士彈琴

幾年調弄七條絲元化分功十指知泉迸幽音離石底

松含細韻在霜枝窓中顧兔初圓夜竹上寒蟬盡散時
唯有此時心更靜聲聲可作後人師

初歸鏡中寄陳端公

去歲離家今歲歸孤帆夢向鳥前飛必知蘆笋侵沙井
兼彼藤花占石磯雲島採茶嘗失路雪龕一作齋中酒不
關扉故交若問逍遙事玄冕何曾勝葦衣

叙錢塘異勝

暖景融融寒景清越臺風送曉鐘聲四郊遠火燒烟月
一道驚波撼郡城夜雪未知東岬綠春風猶放半江晴
謝公吟處依稀在千古無人繼盛名

鹽官王長官新創瑞隱亭

唐詩苑書卷五
指畫便分元化力周迴秀絕自清機孤雲戀帙尋常住
落絮縈風特地飛雛鳥啼花催釀酒驚魚濺水誤沾衣
明年秩滿難將去何似先教畫取歸

題故人廢宅

舉目淒涼入破門鮫人一飯尚知恩閑花舊識猶含笑
怪石無情更不言樵叟和巢伐桃李牧童兼草踏蘭蓀
壺觴嘯詠隨風去唯有聲聲蜀帝魂

寄于少監

修持清苦振佳聲衆鳥那知一鶚情躡履三千皆後學
搏風九萬卽前程名將日月同時朽身是山河應數生
從此雲泥更懸闊漁翁不合見公卿

上鄭員外

爲郡至公兼至察古今能有幾多人憂民亦似清吟苦
守節還如未達貧利刃從前堪切玉澄潭到底不容塵
潛夫豈合干旌旆甘棹漁舟下釣綸

陪李郎中夜宴

紀事云餘杭守謂于苦吟未
能應卒因夜宴以飛字韻命

賦之于
時立成

問世星郎夜宴時丁丁寒漏滴聲稀琵琶絃促千般語
鸚鵡盃深四散飛遍請玉容歌白雪高燒紅燭照朱衣
人間有此榮華事爭遣漁翁戀釣磯

送孫百篇遊天台

東南雲路落斜行入樹穿村見赤城遠近嘗時皆藥氣

高低無處不泉聲映巖日向牀頭沒濕燭雲從柱底生
更有仙花與靈鳥恐君多半未知名

題睦州呂郎中郡內環溪亭

為是仙才登望處風光便似武陵春閑花半落猶迷蝶
白鳥雙飛不避人樹影與餘侵枕簟荷香坐久著衣巾
暫來此地非多日明主那容借寇恂

旅次洋州寓居郝氏林亭

舉目縱然非我有思量似在故山時鶴盤遠勢投孤嶼
蟬曳殘聲過別枝涼月照窓欹枕倦澄泉遶石泛觴遲
青雲未得平行去夢到江頭身旅羈

龍泉寺絕頂

未明先見彙底日良久遠雞才報晨古樹含風鶯帶雨
寒巖四月始知春中天氣爽星河近下界時豐雷雨均
前後登臨思無盡年年改換往來人

叙雪寄喻鳧

密片繁聲旋不久類詩作銷繁風雜霰轉飄飄澄江莫蔽

長流色衰柳難粘自動條濕氣添寒類詩作酤酒夜素

花迎曙類詩作卷簾朝此時明類詩作逕無行類詩作跡唯

望徽之問寂寥此詩從文苑英華錄入集中又有叙雪

急復遲紛紛又勝落花時逡巡不覺藏莎渚宛轉偏
宜傍柳絲透室虛明非月照滿空迴散是風吹高人
坐臥才方逸援
筆應成六出詞

伊璠

紀事云登咸通四年進士第曾爲涇陽令至黃巢亂璠陷寇屢脫命於刃下其後逃避與其家相失夜至藍關猛獸搏而食之

及第後寄梁燭處士

繡轂尋芳許史家獨將羈思遶江沙十年辛苦一枝桂二月艷陽千樹花鵬化四溟歸碧落鶴棲三島接青霞同袍不得同遊翫吟對春風日又斜

武 瓘

紀事云登咸通進士第唐末宰益陽又云瓘初投卷于知舉蕭傲見其感事詩云花開蝶滿枝花謝蝶還稀唯有舊巢燕主人貧亦歸賞其有

存故之志遂放及第

九日衛使君筵上作

佳晨登賞喜還鄉謝字開筵晚興長滿眼黃花初汎酒隔烟紅樹欲迎霜千家門戶笙歌發十里江山白鳥翔共賀安人豐樂歲幸陪珠履侍銀章

袁 皓

藝文志云袁州宜春人龍紀集賢殿圖書使自稱碧池處士所著碧池書三十卷集道林寺詩二卷○紀事云僖宗狩蜀皓時爲倉部員外采李晟功烈爲興元聖功錄徧賜諸將表勵之○全唐詩話云皓初登第過岳陽悅妓藥珠以詩

唐詩苑英華卷三
寄嚴使君曰得意東歸過岳陽桂枝香惹藥珠
香也知暮雨生巫峽爭奈朝雲屬楚王萬恨只
憑期尅手寸心唯繫別離腸南亭宴罷笙歌散
回首烟波路渺茫嚴君以妓贈之

及第後作

金榜高懸姓字真分明折得一枝春蓬瀛乍接神仙侶
江乘迴思耕釣人九萬搏扶排羽翼十年辛苦涉風塵
昇平時節逢公道不覺龍門是嶮津

翁綬

紀事云登咸通進士第

詠酒

逃暑迎春復送秋無非綠蟻滿杯浮百年莫惜千回醉
一盞能消萬古愁幾爲芳菲眠細艸曾因雨雪上高樓
平生名利關身者不識狂歌到白頭

白馬

渥洼龍種雪霜同毛骨天生膽氣雄金埒乍調光照地
玉關初別遠嘶風花朝錦襜垂楊下露濕朱櫻細艸中
一夜羽書催轉戰紫髯騎出佩驂弓

隴頭吟

通典云天水郡有大阪名曰隴坻亦曰隴
山卽漢隴關也三秦記云其阪九回上者
七日乃越上有清水四注下所謂隴頭水

也

隴水潺湲隴樹黃
征人隴上盡思鄉
馬嘶斜月朔風急
雁過寒雲邊思長
殘月出林明
劔戟平沙隔
水見牛羊
橫行俱足

一作

封侯者誰斬樓蘭獻未央

關山月

樂府解題云傷離別也

徘徊漢月滿邊州
照盡天涯到隴頭
影轉銀河寰象靜
光分玉塞古今愁
笳吹遠戍孤烽滅
雁下平沙萬里秋
况是故園搖落夜
那堪少婦獨登樓

雨雪曲

邊聲四合殷河流
雨雪飛來遍隴頭
鐵嶺撥人迷鳥道

陰山飛將溼貂裘
斜飄旌旆過戎帳
半雜風沙入戍樓
一自塞垣無李蔡
何人爲解北門憂

折楊柳

唐書樂志云梁樂府有胡吹歌云上馬不
捉鞭反拗楊柳枝下馬吹橫笛愁殺行客
兒此歌辭元出北國卽鼓角橫吹曲折楊
柳是也宋書五行志云晉太康末京雒爲
折楊柳歌其曲有兵革苦辛之詞按古樂
府又有小折楊柳相和大曲有折楊柳行
清商四曲有月節折楊柳歌十三曲與此
不同

紫陌金隄映綺羅遊人處處動離歌陰移古戍迷芳郭茂
情樂府作荒艸花帶殘陽落遠波臺上少年吹白雪樓中思
婦斂青蛾殷勤攀折贈行客此去關山雨雪多

婕妤怨

讒謗潛來起百憂朝成恩寵暮仇讐火燒白玉非因玷
霜翦紅蘭不待秋花落昭陽誰共輦月明長信獨登樓
繁華事逐東流水團扇悲歌萬古愁

行路難

行路艱難不復歌故人榮達我蹉跎雙輪晚上銅梁一作
臺雪一葉春浮瘴氣波自古要津皆若此方今失路欲
如何君看西漢翟丞相鳳沼朝辭暮雀羅

高駢

新唐書云字千里南平郡王崇文孫也事朱叔
明為司馬有二鷓並飛駢曰我且貴當中之一
發貫二鷓焉眾大驚號落鷓侍御後歷右神策
軍都虞候党項叛率禁兵戍長武有戰功徙屯
泰州即拜刺史兼防禦使咸通中帝將復安南
拜駢為都護俄拔之斬蠻帥段酋遷進檢校刑
部尚書加檢校尚書右僕射僖宗立即其軍加
同中書門下平章事徙劔南西川節度進檢校
司徒封燕國公徙荆南節度王仙芝之敗殘黨
過江帝以駢治郾威化大行且仙芝黨皆郾人

故授駢鎮彘節度使駢遣將梁纘張潏分兵窮
討降其驍帥畢師鐸帝美其功加諸道行營都
統鹽鐵轉運等使俄徙淮南節度副大使傳檄
召天下兵共討賊威震一時廣明初張潏襲黃
巢大破之巢懼騰書于駢丐歸命駢信之泰輟
援兵巢知兵罷擊殺潏乘勝渡江攻天長駢欲
縱賊以聳朝廷然後立功畢師鐸爭之將出師
嬖將呂用之說以觀釁求福駢入其計巢遂北
趨河雒陷兩京帝知駢無出師意乃以王鐸代
爲都統封駢爲渤海郡王駢失兵柄利權卽上
書謾言不恭而吳人顧雲以文辭緣澤其姦偃

然無所忌畏會平賊駢聞縮氣悵悵部下多叛
太鬱鬱無聊乃篤意求神仙以軍事屬用之用
之構殺諸宿將師鐸等懼執駢囚于南第尋命
陳賞等往殺之○藝文志云詩一卷○紀事云
光啓三年駢鎮淮彘三月看花駢與諸從事賦
詩其末云人間無限傷心事不得樽前折一枝
蓋亡滅之讖也及被幽辱計口給食自五月至
八月外圍益急遂及於難

和王昭符進士贈洞庭趙先生

爲愛君山景最靈
角冠秋禮一壇星
藥將鷄犬雲間試
琴許魚龍月下聽
自要乘風隨羽客
誰同種玉驗仙經

唐詩苑英華卷五
烟霞寂寞無人到唯有漁翁過洞庭

寄鄴杜李遂良處士

小隱堪忘世上情可能休夢入重城池邊寫字師前輩
座右題銘律後生吟社客歸秦渡晚醉鄉漁去羨陂晴
春來不得山中信盡日無人傍水行

依韻奉酬李廸

柳下官資顏子居閑情入骨若爲除詩成斬將奇難敵
酒熟封侯快未如只見絲綸終日降不知功業是誰書
而今共飲醇滋味消得柳榆勢利疎

顧雲

藝文志云字垂象池州人虞部郎中所著有顧

氏編遺十卷茗川總載十卷纂新文苑十卷啓
事一卷賦二卷集遺具錄十卷○紀事云饒賈
之子也爲高駢淮南從事師鐸之亂退居雪川
杜門著書宰相杜某奏雲與錢翊司空圖等分
修宣懿德三朝實錄皆一時之選也乾寧初卒
○通攷云鳳策聯華三卷陳氏云多以擬古爲
題蓋行卷之文也雲咸通十五年進士

柳

帶露含烟處處垂綻黃搖綠嫩參差長隄未見風飄絮
廣陌初憐日映絲斜傍畫筵偷舞態低臨粧閣學愁眉
離亭不放到春暮折盡拂簷千萬枝

盧渥

全唐詩話云字子章軒冕之盛近代無比伯仲
四人咸居顯列乾符初母憂服闋渥自前中書
舍人拜陝府觀察使弟沼前長安令除給事中
弟沅自前集賢校理除左拾遺弟治自畿尉遷
監察御史詔書疊至士族榮之及赴任陝郊自
居守分司朝臣已下牙設祖筵雒城爲之一空
都人聳觀亘數十里又云渥在舉場甚有時稱
曾於滻水逆旅遇宣宗微行意其貴人斂身避
之帝呼與相見乃自稱進士盧渥帝請詩卷袖
之而公他日對宰臣語及渥令主司擢第宰臣

問渥與主上有何階緣渥具陳其由時亦不以
爲忝○本事詩云渥應舉之歲偶臨御溝見一
紅葉葉上有絕句置於巾箱或呈於同志及宣
宗放宮人初下詔許從百官司吏獨不許貢舉
人盧後一任范陽獲一宮人卽題紅葉者也其
詩曰水流何太急深宮盡日閒殷勤謝紅葉好
公到人間○紀事云唐末渥自陝府廉察入朝
知舉遇巢寇犯闕不及終場趙崇戲之曰出腸
不生養主司也蓋盧氏未嘗知舉盧相攜耻之
爲主文卒不果渥終檢校司徒

題嘉祥驛

交親榮餞雒城空乘鉞戎裝上將同星使自天丹詔下
雕鞍照地數程中馬嘶靜谷聲偏響旆映晴山色更紅
別後定知人易老滿街棠樹有遺風

李昌符

紀事云字巖夢登咸通四年進士第歷尚書郎
○北夢瑣言云昌符有詩名久不登第嘗歲卷
軸怠于裝修因出一奇乃作婢僕詩五十首於
公卿間行之浹旬京城甚傳是年登第

詠鐵馬鞭并引

鐵馬鞭長慶二年義成軍節度使曹華進
獻且曰得之汴水有字刻云貞觀四年尉

遲敬德字尚在

漢將臨流得一作鐵鞭鄂侯名字舊雕鐫須爲聖代無
雙物肯逐將軍臥九泉汗馬不侵誅虜血神功今見補
亡篇時來終薦明君用莫嘆沉埋二百年

送友人

舉世誰能與事期解攜多是正歡時人間不遣有名利
陌上始應無別離晚渡待船秋立久辭山投店獨行遲
我今漂泊還如此江劍相逢亦未知

秋夜作

數畝池塘近杜陵秋天寂寞夜雲凝芙蓉葉上三更雨
蟋蟀聲中一點燈跡避險巇翻失路心歸閑澹不因僧

既逢上國陳詩日長守林泉亦未能

司空圖

新唐書云字表聖河中虞鄉人咸通末擢進士
禮部侍郎王凝特所獎待俄而凝坐法貶商州
圖感知已往從之凝起拜宣歙觀察使乃辟置
幕府召爲殿中侍御史不忍去凝府臺劾左遷
光祿寺主簿分司東都宰相盧攜嘉圖節調觀
察使盧渥曰司空御史高士也渥卽表爲僚佐
會攜復執政召拜禮部員外郎尋遷郎中黃巢
陷長安奔咸陽間關至河中僖宗次鳳翔卽行
在拜知制誥遷中書舍人後狩寶雞不獲從又

還河中龍紀初復拜舊官以疾解景福中拜諫
議大夫不赴後再以戶部侍郎召身謝闕下數
日卽引去昭宗在華召拜兵部侍郎以足疾固
自乞會遷雒陽柳璨希賊臣意誅天下才望助
喪王室詔圖入朝圖陽墮笏趣意野菴璨知無
意于世乃聽還圖本居中條山王官谷有先人
田遂隱不出作亭觀素室悉圖唐興節士文人
名亭曰休休作文以見志曰休美也旣休而美
具故量才一宜休揣分二宜休耄而曠三宜休
又少也惰長也率老也迺三者非濟時用則又
宜休因自目爲耐辱居士其言詭激不啻以免

唐詩苑卷五
當時禍災云豫爲冢棺遇勝日引客坐壙中賦
詩酌酒裴回客或難之圖曰君何不廣邪生死
一致吾寧暫游此中哉每歲時祠禱鼓舞圖與
閭里耆老相樂王重榮父子雅重之數饋遺弗
受嘗爲作碑贈絹數千圖置虞鄉市人得取之
一日盡時寇盜所過殘暴獨不入王官谷士人
依以避難朱全忠已篡召爲禮部尚書不起哀
帝弑圖聞不食而卒年七十二○藝文志云一
鳴集三十卷○通攷陳氏云蜀本司空集但有
雜著無詩自有詩十卷別行

浙上

朱鶴齡云浙上是今鄞陽府地在秦楚之交故有秦雲楚雨之句

華下支離已隔河又來此地避干戈山田漸廣猿時鼓
頻作到村舍新添燕亦多丹桂石楠宜並長秦雲楚雨暗
相和兒童栗熟述歸路歸得仍隨牧豎歌

又

西北鄉關近帝京烟塵一片正傷情愁看地色連空色
靜聽歌聲似哭聲紅蓼滿文苑英華作華作遮村人不在青山遶檻
路難平從他烟棹更南去休向津頭問去程

山中

全家與鼓吹我戀孤岑蹋得蒼苔一徑深逃難人多分
隙地放生麋大出寒林名應不朽輕仙骨理到忘機近
佛心昨夜前溪驟雷一作風雨晚晴閑步數峰吟鼓吹作數溪禽

寄贈詩僧秀公

靈一心傳清塞心可公吟後礎公吟近來雅道相親少
惟仰吾師所得深好句未停無暇日舊山歸老有東林
冷曹孤宦甘寥落多謝攜筇數訪尋

重陽日訪元秀上人

紅葉黃花秋景寬醉吟朝夕在樊川却嫌今日登山俗
且共高僧對榻眠別畫長懷吳寺壁宜茶偏賞雪溪泉
歸來童穉爭相笑何事無人與酒船

丁未歲歸王官谷

家山牢落戰塵西疋馬偷歸路已迷冢上卷旗人簇立
花邊移寨鳥驚啼本來薄俗輕文字却致中原動鼓鼙

將取一壺閑日月長歌深入武陵溪

書懷

病來猶強引雛行力上東原欲試耕幾處馬嘶春麥長
一川人喜雪峰晴閑知有味心難肯道貴謀安迹易平
陶令若能兼不飲無絃琴亦是沽名

退棲

宦遊蕭索爲無能移住中條最上層得劔乍如添健僕
亡書久似失紀事良朋燕昭不是空憐馬支遁何妨亦
愛鷹自致此身繩檢外肯教世路日兢兢

五十

閑身事少只題詩五十今來覺陡衰清秩偶叨非養望

丹方頻試更堪疑鬢強染三分折絃管遙聽一半悲
漉酒有巾無黍釀負他黃菊滿東籬

新歲對寫真

得見明時下壽身須甘歲酒更移巡生情暗結千重恨
寒勢常欺一半春文武輕銷丹竈火市朝偏貴黑頭人
自傷衰颯慵開鏡擬與兒童別寫真

華下

籜冠新滯步池塘逸韻偏宜夏景長扶起綠荷承早露
驚迴白鳥入殘陽久無書太干時貴時有僧來自故鄉
不用名山訪真訣退休便是養生方

重陽山居

詩人自古恨難窮暮節登命且喜同四望交親兵亂後
一川風物笛聲中菊殘深處迴幽蝶陂動晴光下早鴻
明日更期來此醉不堪寂寞對衰翁

爭名

爭名豈在更搜奇不朽纔消一句詩窮辱未甘英氣阻
乖疎還有正人知荷香泥露侵衣潤松影和風傍枕移
只此共栖塵外境無妨亦戀好文時

光啓四年春戊申

亂後燒殘數架書峰前猶自戀吾廬忘機漸喜逢人少
覽鏡空憐待鶴疎孤嶼池痕春漲滿小闌花韻午晴初
酣歌自適逃名久不必門多長者車

丁巳重陽

重陽未到已登臨探得黃花且獨斟客舍喜逢連日雨
家山似響隔河砧亂來已失耕桑計病後休論濟活心
已且病焉
安能活人自賀逢時能自棄歸鞭唯拍馬羈吟

喜王駕小儀重陽相訪

白菊初開臥內明聞君相訪病身輕樽前且撥傷心事
谿上還隨覓句行幽鶴傍人疑舊識殘蟬向日噪新晴
擬將寂寞同留住且勸康時立大名

聶夷中

藝文志云字坦之咸通華陰尉詩二卷○紀事
云咸通十二年高湜知舉榜內孤寒者夷中公

乘億許棠夷中尤貧苦精古詩

聞人說棄北事有感

故鄉歸路隔高雷見說年來事可哀村落日中眠虎豹
田園雨後長蒿萊兼隅久已無春色地底真成有劫灰
荆棘滿山行不得不知當日是誰栽

周繇

紀事云字為憲池州人及咸通進士第以明皇

夢鍾馗賦知名

經故宅有感

身沒南荒雨露賒朱門空鎖舊繁華池塘鑿就方通水
桃杏栽成未見花異代圖書藏幾篋傾城羅綺散誰家

昔年埏埴生靈地今日生人爲嘆嗟

許崇

藝文志云字文化詩一卷○紀事云宣州涇縣人登咸通十二年進士第有洞庭詩最工時號許洞庭其詩云驚波常不定半日鬢堪斑四顧疑無地中流忽有山鳥飛應畏墮帆遠却如閑漁父時相引行歌浩渺間

成紀書事

蹉跎遠入犬羊中荏苒將成白首翁三楚田園歸未得五原岐路去無窮天垂大野鵬盤草月落孤城角嘯風難問開元向前事依稀猶認隗囂宮

楊夔

高棟云咸通時人○藝文志云集五卷又宄書十卷宄餘集一卷

題鄭山人郊居

谷口今逢避世才入門瀟灑絕塵埃漁舟下釣乘風去藥醞留賓待月開數片石從青嶂得一條泉自白雲來竹軒相對無閑語盡日南山不欲迴

題宣州延慶寺益公院

咸通中入講極承恩澤

嘿坐能除萬種情臘高兼有賜衣榮講經舊說傾朝聽登殿曾聞降輦迎幽逕北連千嶂碧虛窓東望一川平長年門外無塵客時見元戎駐旆旌

寄當陽袁皓明府

高人為縣在南京竹遶琴堂水遶城地古既資攜酒興
務閑偏長看山情松軒待月僧同坐藥圃尋花鶴伴行
百里甚堪留惠愛莫教空說魯恭名

張喬

紀事云池州人有詩名咸通中與許棠俞坦之
劇燕任濤吳宰張贛周繇鄭谷李棲遠温憲李
昌符調之十哲又云京兆府解試月中桂詩喬
擅場其年李建州頻生試以許棠老於場屋以
為首薦未幾巢寇為亂遂與伍喬之徒隱九華

○藝文志云詩集二卷

河中鶴雀樓

高樓懷古動悲歌鶴雀今無野雀集作燕過樹隔五陵秋
色早水連三晉夕陽多漁人遺火成寒燒牧笛吹風起
夜波十載重來值搖落天涯歸計欲如何

書邊事

萬里沙西寇已平犬羊群外築空城分營夜火燒雲遠
杪獵秋鷗掠草輕秦將力隨胡馬竭蕃河流入漢家清
羌戎不識干戈老須賀明時聖主明

送何道士歸山

身非絕粒本清羸束掛仙經杖一枝落葉獨尋流水去
深山長與白雲期樹圍丹竈寒花發壇近清風夜月遲

樵客若能隨洞裏迴歸人世始應悲

胡曾

高棟云長沙人咸通中舉進士不第嘗爲漢南節度從事有詠史詩一卷安定集十卷行世

寒食都門作

二年寒食住京華寓目春風萬萬家金絡馬銜原上草
玉顏人折路傍花軒車竟出紅塵外冠蓋爭回白日斜
誰念都門兩行淚故園寥落在長沙

薄命妾

阿嬌初失漢皇恩舊賜羅衣亦罷熏倚枕夜悲金屋雨
卷簾朝泣玉樓雲宮前葉落鴛鴦瓦架上塵生翡翠裙
龍騎不巡時漸久長門空掩綠苔紋

獨不見

玉關一自有氛埃年少從軍竟未回門外塵凝張樂榭
水邊香滅按歌臺窻殘夜月人何處簾捲春風燕復來
萬里寂寥音信絕寸心爭忍不成灰

交河塞下曲

交河水薄日遲遲漢將思家感別離塞北草生蘇武泣
隴西雲起李陵悲曉侵雉堞鳥先覺春入關山雁獨知
何處疲兵心最苦夕陽樓上笛聲時

車遥遥

自從車馬出門朝便入空房守寂寥玉枕夜殘魚信絕

金鈿秋盡雁書遙
臉邊楚雨臨風落
頭上春雲向日銷
芳草又衰還不至
碧天霜冷轉無憐

早發潛水驛謁郎中員外

半牀秋月一聲雞
萬里行人費馬蹄
青野霧銷凝晉洞
碧山烟散避秦溪
樓臺稍辨烏城外
更漏微聞鶴柱西
已是大仙憐後進
不應來向武陵迷

贈漁者

不媿人間萬戶侯
子孫相繼老扁舟
往來南越諳鮫室
生長東吳識蜃樓
自爲釣竿能遣悶
不因萱草解銷憂
羨君獨得逃名趣
身外無機任白頭

自嶺下泛鷁到清遠峽作

乘船浮鷁下韶水
絕境方知在嶺南
薜荔鼓吹作蘿雨餘
山似黛蕪葭烟盡
島如藍
旦遊蕭帝新松寺
夜宿嫦娥桂影潭
不爲篋中書未獻
便來茲地結茅庵

題周瑜將軍廟

共說前生國步難
山川龍戰血漫漫
交鋒魏帝旌旂退
委任君王社稷安
庭際雨餘春草長
廟前風起晚光殘
功勳碑碣今何在
不得當時一字看

唐彥謙

舊唐書云字茂業咸通末應進士才高負氣無
所屈降十餘年不第乾符末河南盜起兩都覆
沒以其家避地漢南中和中王重榮鎮河中辟

爲從事累奏至河中節度副使歷晉絳二州刺史彥謙博學多藝文詞壯麗至於書畫音樂博飲之技無不出於草流尤能七言詩少時師溫庭筠故文格類之光啓末王重榮爲部下所害朝議責叅佐貶爲漢中掾曹楊守亮鎮興元聞其名署爲判官累官至副使閬壁三郡刺史卒於漢中有詩數百篇號鹿門先生集行於世○藝文志云詩集三卷○高棟云并州人○紀事云彥謙卽陶穀之祖也穀避晉祖諱改姓陶後遂不易識者非之

長陵

一刻曹松

長陵高闕此安劉附葬纍纍盡列侯豐上舊居無故里沛中原廟對荒丘耳聞明主提三尺眼見愚民盜一杯千載腐儒騎瘦馬涓城斜日重回頭

蒲津河亭

宿雨清秋霽景澄廣亭高樹一作榭向晨興烟橫博望乘槎水上文王避雨陵孤棹夷猶期獨往曲闌愁絕每長凭思鄉懷古多傷別况此哀吟意不勝

秋霽豐德寺與玄貞師詠月

露冷風輕霽魄圓高樓更在碧山巔四溟水合疑無地八月槎通好上天黯黯星辰環紫極喧喧朝市匝一作蔽蒼烟夜深獨與巖僧語群動消聲舉世眠

新豐

沛中歌舞百餘人帝業功成里巷新
半夜素靈先哭楚一星遺火下燒秦
貔貅掃盡無三戶雞犬歸來識四鄰
惆悵故園前事遠曉風長路起埃塵

月雜詠作中秋夜翫月

一上雜詠作夜高樓萬景奇碧天無際水無涯
空雜詠作只留皎

月當層漢並送浮雲出四維霧盡雜詠作靜不容玄豹隱冰

生祇雜詠作惟恐夏蟲疑坐來離思憂生晚雜詠作將曉爭得姮

娥子細知

七夕

露白風清夜向晨小星垂珮且埋輪
絳河浪淺休相隔

滄象波滾尚作塵天外鳳凰何寂寞
世間烏鵲漫辛勤

猗蘭殿北斜樓上多少通宵不睡雜詠作寐人

八月十六日夜月

斷腸佳賞固難期昨夜消魂更不疑
丹桂影空蟬有露綠槐陰在鵲無枝
懶將吟咏聊惆悵早是疎頑耐別離
堪恨賈生曾慟哭不緣清景為憂時

牡丹

真宰多情巧思新固將能事送殘春
為雲為雨徒虛語傾國傾城不在人
開日綺霞應失色落時青帝合傷神
嫦娥婺女曾相送留下鷓鴣黃作蘂塵

興元沈氏莊

清淺縈紆一水間竹岡藤樹小躋攀露霑荒草行人過
月上高林宿鳥還江遶武侯籌筆地雨昏張載勒名山
異鄉一笑因酣醉忘却愁來鬢髮斑

緋桃

短墻荒圃四無鄰烈火緋桃墜地春坐久好風休掩袂
夜來細雨已沾衣敢同俗態期青眼似有微辭動絳唇
盡日更無鄉念此時何必見秦人

秋晚高樓

松拂疎窓竹映闌素琴幽怨不成彈清霄霽極雲離岫
紫禁風高露滿盤晚蝶飄零經宿雨莫鴉凌亂報秋寒
高樓睽目歸鴻遠始信嵇康欲畫難

柳

春思春愁一萬枝遠村遙岬寄相思西園有雨和苔長
南內無人拂檻垂遊客寂寥緘遠恨莫鬢啼叫惜芳時
晚來飛絮如霜鬢恐爲多情管別離

春陰

一寸迴腸百慮侵旅愁危涕兩爭禁天涯已有銷魂別
樓上寧無擁鼻吟感事不關河裏笛傷心應倍雍門琴
春雲更覺愁于我間蓋低村作暝陰

寄懷

有客傷春復怨離夕陽亭畔草青時淚隨紅蠟無由制
腸比朱絃恐更危梅向好風惟是笑柳因微雨不勝垂

雙溪未去饒歸夢夜夜孤眠枕獨歆

滕倪

全唐詩話云滕倪苦心為新詩嘉聲早播遠之
吉州謁宗人太守郎中邁邁每吟其句云白髮
不能容相國也同閒客滿頭生又題鷺鷥障子
云映水有深意見人無懼心邁曰魏文惜陳思
之學潘岳褒正叔之文貴集一家之盛如此

留別滕邁

秋初江上別旌旗故國無家淚欲垂千里未知投足處
前程便是聽猿時誤攻文學身空老却返樵漁計
羽翼凋零飛不得丹霄無路接差池紀事云倪邁秋賦
捧笈告遊留詩為

別悵然曰是必不祥倪至秋卒
於商於館舍聞者莫不傷焉

章碣

紀事云孝標之子登乾符進士第○藝文志云
詩一卷

寄友人

謝家山水屬君家曾共持鈎擲歲華竹裏竹鷄眠薛石
溪頭鷓鴣踏金沙登樓夜坐三層月接果春看五色花
昨日西風動歸思滿船涼葉在天涯

浙西送杜晦侍御入關

紫詔徵賢發帝聰繡衣行處撲香風鷄歸秦樹幽禽散
星出吳天列舍空捧日思馳仙掌外朝宗勢動策門中

鞭鞘所拂三千里多少諸侯合避驄

城東卽事

閒尋一作遊香陌鳳城東時暫開襟向遠風玉笛一聲芳草外錦鴛雙起碧流中苑邊花竹濃如繡渭北山川澹似空回首漢宮烟靄裏天河金閣未央宮

夏日湖上卽事寄晉陵蕭明府

亭午羲和駐火輪開門嘉樹庇湖濱行來賓客奇茶味睡起兒童帶簟紋屋小有時投樹影舟輕不覺入鷗群陶家豈是無詩酒公退堪驚日已曛

桃源

絕壁相欹是洞門昔人從此入仙源數株花下逢珠翠

半曲歌中老子孫別後自疑園吏夢歸來誰信釣翁言山前空有無情水猶遶當時碧樹村

曲江

日暍香塵逐馬蹄風吹浪濺幾迴隄無窮羅綺填花徑太半笙歌占麥畦落絮却籠他樹白嬌鶯更學別禽啼祇緣頻宴蓬洲客引得遊人去似迷

癸卯歲毗陵會中貽同老

玉皇恩詔別星班去壓徐方分野間有鳥盡巢垂汴柳無樓不到隔淮山旌旗漸向行時擁案牘應從到日間想憶朝天獨吟坐旋攜集作飛新作過秦關

雨

低著烟花漠漠輕正堪吟坐掩柴扃亂沾細網垂窮巷
斜送陰雲入古廳鎖却暮愁終不散添成春醉轉難醒
霽來還有風流事重染南山一遍青

陪浙西王侍郎夜讌

深鎖雷門讌上才旋看歌舞旋傳杯黃金鸚鵡當筵睡
紅錦薔薇映燭開稽嶺好風吹玉珮鏡湖殘月照樓臺
小儒末座頻傾耳祇怕城頭畫角催

沈彬

紀事云字子文高安人也天才狂逸好神仙之事少孤西遊以三舉爲約嘗夢著錦衣貼月而飛識者言雖有虛名不入月矣乾符中南遊嶺

表二十餘年回吳中江南僞命吏部郎中致仕
又云彬唐末遊湖湘隱雲陽山十年餘與虛中
齊已貫休以詩名相吹噓又與韋莊杜光庭
和皆蜀人也疑其曾入蜀○南唐書云元宗遷
南都彬年八十餘來見曰臣久處山林不預世
事臣妻曰君主入郎君今爲天子何不一往臣
遂忘衰老而來元宗命母拜厚賜粟帛以其子
爲秘書省正字

入塞曲

欲爲皇王服遠戎萬人金甲鼓鼙中陣雲暗塞三邊黑
兵血愁天一片紅半夜翻營旗攪月深秋防戍劔磨風

唐詩英華卷三十四
謗書未及明君
焚臥骨將軍已歿功

又

苦戰沙間臥箭痕
戍樓閑上望星文
生希國澤分偏將
死奪河源答聖君
鸞覩敗兵眠白草
馬驚邊鬼哭陰雲
功多地遠無人紀
漢閣笙歌日又曛

楊慎詩品云唐沈彬有詩二卷舊藏有之其入塞詩云年少辭鄉事冠軍戍樓閑上望星文生希沙漠擒驕虜死奪河源答聖君鸞覩敗兵眠血草馬驚冤鬼哭愁雲功多地遠無人紀漢閣笙歌日又曛此言盡邊塞之苦郭茂倩樂府亦載之而句字不同其本集所載為勝特具錄之

塞下

寒葉聲悲秋欲霜
塞山數點下牛羊
映霞旅雁隨疎雨
向磧行人帶夕陽
邊騎不來沙路失
國恩深後棄城荒

胡兒向化新成長
猶自千回問漢王

又

貴主和親殺氣沉
燕山間獵鼓聲音
旗分雪草偷邊馬
箭入寒雲落塞禽
隴月盡牽鄉思動
戰衣誰寄淚痕深
金釵謾作封侯別
孽破佳人萬里心

又

月冷榆關過雁行
將軍寒笛老思鄉
貳師骨恨千夫壯
李廣魂飛一劍長
戍肉就沙催落日
陰雲分磧護秋霜
誰知漢武輕中國
閒奪天山草木荒

金陵雜題

暮潮聲落草光沉
賈客來帆宿岍陰
一笛月明何處酒

滿城秋色幾家砧時清曾惡桓温盛山翠長牽謝傅心
今日到來何物在碧空和雨鎖寒林

秋日

秋含砧杵搗斜陽笛引西風顥氣涼
薜荔惹烟籠蟋蟀
芰荷翻雨潑鴛鴦當年酒賤何妨醉
今日時難不易狂
腸斷舊遊從一別潘安惆悵滿頭霜

贈劉象


曾應大中天子舉四朝風月鬢蕭疎不隨世祖重攜劍
却爲文皇再讀書十載戰塵銷舊業滿城春雨壞貧居
一枝何事於君惜仙桂年年幸有餘紀事云劉象孤寒
三十舉無成主司
覽彬詩其年
特放棄象及第

憶仙謠

白榆風颯九天秋王母朝迴宴玉樓日月漸長雙鳳睡
桑田欲變六鼇愁雲翻簫管相隨
公星觸旌幢各自流
詩酒近來狂不得騎龍却憶上清遊

唐詩英華卷十六目錄

友人
紀映鍾
施 諲
陸元輔
潘檉章
叅輯

晚唐六 

皮日休 五首

陸龜蒙 九首

松陵集皮陸唱和詩七十五首

顏 萱 二首

張 賁 五首

李 穀 一首

司馬都 一首

鄭 璧 二首

魏 朴 一首

李 洞 十五首

唐詩英華卷十六

吳江顧有孝茂倫編

晚唐六



皮日休

藝文志云集一卷又胥臺集七卷文藪十卷詩一卷○通攷晁氏云字襲美一字逸少隱鹿門山自號醉吟先生以文章自負尤善箴銘咸通八年登進士第為著作佐郎太常博士乾符喪亂東出關為毘陵副使陷巢賊中賊遣為識文疑其譏已遂害之集乃咸通丙戌年居州里所編自序云發篋次類文彙繁如藪澤因以名之

凡二百篇○陳氏云黃巢之難日休陷賊中爲
果頭三屈律之讖賊疑譏已髮拳遂見害陸游
筆記以皮光業碑辨其不然○北夢瑣言云日
休傲誕自號間氣布衣日休之子光業辭學宏
瞻唐末爲越州刺史

過雲居院玄福上人舊居

重到雲居獨悄然隔窻窺影尚疑禪不逢野老來聽法
猶見隣僧爲引泉龕上已生新石耳壁間空帶舊茶烟
南京弟子時時到泣把山花奠几筵

西塞山泊漁家

白綸巾下髮如絲靜倚楓根坐釣磯中婦桑村挑菜去

小兒沙市買蓑歸雨來蓴菜流船滑春後鱸魚墜釣肥
西塞山前終日客隔波相羨盡依依

襄州春遊

信馬騰騰觸處行春風相引與詩情等閑遇事成歌咏
取次衝筵隱姓名映柳認人多錯誤透花窺鳥最分明
岑牟單絞何曾著莫道猖狂似彌衡

送從弟歸復州

羨爾優游正少年竟陵烟月似吳天車螯近岬無妨取
舴艋隨風不費牽處處路傍千頃稻家家門外一渠蓮
慇懃莫笑襄陽住爲愛南遊縮頸一作編

題潼關蘭若

潼津罷警有招提近百年無戰馬嘶壯士不言三尺劔
謀臣休道一丸泥昔時馳道洪波上今日宸居紫氣西
關吏不勞重借問棄繻生擬入耶溪

陸龜蒙

新書隱逸傳云字魯望少高放通六經大義尤
明春秋舉進士一不中往從湖州刺史張搏游
搏歷湖蘇二州辟以自佐嘗至饒州三日無所
詣刺史蔡京率官屬就見之龜蒙不樂拂衣去
居松江甫里多所論撰雖幽憂疾痛貲無十日
計不少輟也文成竄稿篋中或歷年不省爲好
事者盜去得書熟誦乃錄讐比勤勤朱黃不吝

手所藏雖少其精皆可傳借人書籍褻壞舛必
爲輯褫刊正有田數百畝屋三十楹田苦下雨
潦則與江通故嘗苦饑嗜茶置園顧渚山下歲
取租茶自判品第張又新爲水說七種其二慧
山泉三虎丘井六松江人助其好者雖百里爲
致之初病酒再暮乃已其後客至絜壺置杯不
復飲不喜與俗流交雖造門不肯見不乘馬升
舟設蓬席齋束書茶竈筆牀釣具往來時謂江
湖散人或號天隨子甫里先生自比涪翁漁父
江上丈人後以高士召不至李蔚盧攜素與善
及當國召拜左拾遺詔方下龜蒙卒光化中韋

唐詩英華卷其
莊表龜蒙及孟郊等十人皆贈右補闕○通攷
晁氏云龜蒙少工歌詩其體裁不一卒造乎平
淡而已自號江湖散人或號甫里先生皆爲之
傳新史多取之而獨不云工歌詩笠澤者松江
地名也其集自序云自乾符六年春臥病笠澤
時亦隱几著書詩賦銘記往往雜混而錄之故
曰叢書今按其集歌詩爲多又比他文最工新
史疎漏如此○楊文公談苑云唐陸龜蒙善爲
賦絕妙人有收得賦材皆綴緝屬對差次比擬
凡數首有題而未就蓋其構思用功之非淺相
傳龜蒙多智數狡獪居笠澤有內養自長安使

杭州舟出舍下小童奴以小舟驅群鴨出內養
彈其一綠頭雄鴨折頸龜蒙遽從舍出大呼云
此綠鴨有異善人言適將獻狀本州貢天子今
持此死鴨以詣官自言耳內養少長宮禁不知
外事信然甚驚駭厚以金帛遺之龜蒙乃止因
徐問龜蒙曰此鴨何言龜蒙曰嘗自呼其名巧
捷多類此○葉茵云魯望居甫里著吳興實錄
四十卷松陵集十卷笠澤叢書四卷清風素節
凜凜千古因疑談苑所傳之過茵所居視甫里
無一舍遠其地荒僻眇在松江之東去驛程猶
有數十里使者無由過也自武宗暨昭宗凡六

十三載未嘗遣內養使杭州揆之地理考之唐紀信其爲誣豈談苑別有所據云○范成大吳郡志云咸通中崔璞守吳郡皮日休爲郡從事與處士陸龜蒙爲文會之友風雨晦冥蓬蒿翳薈未嘗不作詩璞間爲詩亦令兩人屬和吳中名士亦多與焉一年間所作盈積龜蒙哀爲十通日休名之曰松陵集

二遺詩并序

二遺者何石枕材琴薦也石者何松之所化也松者何越之東陽也東陽多名山就中金華爲最枝峰蔓壑秀氣磅礴者數百

里不啻神仙登臨草木芬怪永康之地亦蟬聯其間中饒古松往往化而爲石盤根大柯文理曲折盡爲好事者得而致于人間以爲耳目之異太山羊振文得枕材趙郡李中秀得琴薦皆茲石也咸以遺予予以二遺之奇聊賦詩以謝

誰從毫末見叅天又到蒼蒼化石年萬古清風吹作籟一條寒溜滴成穿鼓吹閒追金帶徒勞恨靜格音各朱絲更可憐幸與野人俱散誕不煩良匠更雕鑿

鷓鴣并序

客有過震澤得水鳥所謂鷓鴣者貺予果

襟青脰碧爪丹喙張救反鳥嘴也色幾及項質甚

高而意卑戚畏人予極哀其野逸性又非

以能招累者而囚錄籠檻逼迫窻戶俛啄

仰飲為活大不快真天地之窮鳥也為之

賦詩擬好事者和

詞賦曾誇鷦徒角切瑒牛欲切流果為名誤別滄洲雖蒙靜

置疎籠晚不似間栖折葦秋自昔稻梁高鳥畏至今

組野人讐防微避繳無窮事好與裁書謝白鷗

問書

病學高僧置一牀披衣纔暇即焚香閒階雨過苔花潤

小簾風來薤葉涼南國羽書催部曲時黃巢圍廣州告急東山毛

褐傲羲皇升平聞道無時節試問中林亦不妨

寄吳融

一夜秋聲入井桐數枝危綠怕西風霏霏晚砌烟華上

浙浙疎簾雨氣通君整鼓吹作隱輪蹄名未了我依琴鶴病

相攻到頭江畔從漁事織作中流萬尺筵郝天挺云取魚具也

中秋待月

轉缺霜輪上轉遲好風偏似送佳期簾斜樹隔情無限

燭暗香殘坐不辭最愛笙調聞北里漸看星澹失南箕

何人為校清涼力未似初圓欲午時

重憶白菊蜀本作兩絕

我憐貞白重寒芳前後叢生夾小堂月朶暮開無絕艷

風莖時動有奇香何慚謝雪清才詠不羨劉梅貴主粧
更憶幽窓凝一夢夜來村落有微霜

別墅懷歸

水國初冬和暖天南榮方好背陽眠題詩朝憶復暮憶
見月上弦還下弦遙為晚花吟白菊近炊香稻識紅蓮
何人授我黃金百買取蘇君負郭田

寄淮南鄭寶書記

記室千年翰墨孤唯君才學似應徐五丁驅得神功盡
二酉搜來秘檢疎煬帝帆檣留澤國淮王牋奏入班書
清詞醉草無因見但釣寒江半尺鱗

小雪後書事

時候頻過小雪天江南寒色未曾偏楓汀尚憶逢人別
麥隴唯應欠雉眠更擬結茅臨水次偶因行藥到村前
隣翁意緒相安慰多一作說明年是稔年

松陵集唱和詩

寒夜同襲美訪北禪院寂上人

陸

月樓風殿靜沉沉披拂霜華訪道林鳥在寒枝棲影動
人依古堞坐禪深明時尚阻青雲步半夜猶追白雪吟
自是兼邊鷗伴侶不勞金偈更降心

次和

皮

院寒清靄正沉沉霜棧乾鳴入古林數葉貝書松火暗
一聲金磬檜烟深陶潛見社無妨醉殷浩譚經不廢吟

何事欲攀塵外契除君皆有利名心

和龔美江南道中懷茅山廣文南陽博士

陸

一片輕帆背夕陽望三峰拜七真堂三茅二許一陽天

寒夜漱雲牙淨上元寶經云太極真人服四極雲牙雪壞晴梳石髮香風

記云石髮若也自拂烟霞安筆格音閣獨開封檢試砂牀倦遊錄云辰州

有朱砂處即有小龕龕中生白石牀上乃莫言洞府能

招隱會輾颺輪見玉皇神仙傳云玄圃閬苑環以弱水九重非輾車羽輪不可到

又

壺中行坐可攜天何況林間息萬緣組綬任垂三品石

珮環從落四公泉丹臺已運陰陽火碧簡須雕次第仙

廣文王季猶在場中想得雷平春色動五芝烟甲又芋眠

又

良常應不動移文金醴從酸亦自醺蓬萊公維廣文以金醴四升待主簿

主簿恨其味酸桂父舊歌飛絳雪桐孫新韻倚玄雲春臨柳谷

鶯先覺曙醮蕪香鶴共聞珍重雙雙玉條脫盡憑三島

寄羊君

行次野梅

皮

葛拂蘿梢一樹梅玉妃無侶獨徘徊好臨王母瑤池發

合傍蕭家粉水開共月已為迷眼伴與春先作斷腸媒

不堪便向多情道萬片霜華雨損來

次和

陸

飛棹參差拂早梅強欺寒色尚低徊風憐薄媚留香與
月會深情借艷開梁殿得非蕭帝瑞齊宮應是玉兒媒
不知謝客離腸醒臨水剛添萬恨來

和揚州看辛夷花

陸

柳疎梅墮少春叢天遣花神別致功高處朶稀難避日
動時枝弱易爲風堪將亂葢添雲肆若得千株便雪宮
不得群芳應有意等閒桃杏卽爭紅

暇日獨處寄魯望

皮

幽慵不覺耗年光犀柄金徽亂一牀野客共爲賒酒計
家人同作借書忙園蔬預遣分僧料廩粟先教筭鶴糧
無限高情好風月不妨猶得事吾王

奉和

陸

謝府殷樓少暇時又拋清宴入書帷三千餘歲上下古
八十一家文字奇司馬遷書上下紀三千餘歲冷夢漢
臯懷鹿隱靜憐烟鳥覺鴻離知君滿篋前朝事鳳諾龍
奴借與窺

屣步訪魯望不遇

皮

雪晴墟里竹欹斜蠟屐徐吟到陸家荒徑掃稀堆栢子
破扉開澁染苔花壁閒定欲圖雙檜厨靜空如飯一麻
擬受太玄今不遇可憐遺恨似侯芭

奉和襲美見訪不遇

陸

爲愁烟岫老塵囂扶病呼兒鬪翠茗祇道府中持簡牘

不知林下訪漁樵花盤小墜晴初壓葉擁疎籬凍未燒
倚杖徧吟春昭午一池冰段幾多消

開元寺客省早景卽事

皮

客省蕭條柿葉紅樓臺如畫倚霜空銅池數滴桂上雨
金鐸一聲松杪風鶴靜時來珠像側鴿馴多在寶幡中
如何塵外虛爲契不得支公此會同

闔閭城北有賣花翁討春之士往往造焉因

招襲美

陸

故城邊有賣花翁水曲舟輕去盡通十畝芳菲爲舊業
一家烟雨是元功間添藥品年年別笑指生涯樹樹紅
若要見春歸處所不過攜手問東風

病孔雀

皮

烟花雖媚思沉冥猶自擡頭護翠翎強聽紫簫如欲舞
困眠紅樹似依屏因思桂蠹傷肌骨爲憶松鵝損一作換
性靈盡日春風吹不起鈿毫金縷一星星

奉和

陸

懶移金翠傍簷楹斜倚芳叢舊態生唯奈瘴烟籠飲啄
可堪春雨滯飛鳴鴛鴦水畔迴頭羨荳蔻圖前舉眼驚
郝天挺云孔雀出所多
荳蔻故見其圖必驚喜爭得鷓鴣來伴著郝天挺云有
孔雀處亦有

鷓鴣不妨還技有心情

聞魯望遊顏家林園病中有寄

皮

一夜韶姿著水光謝家春草滿池塘細挑泉眼尋新脉

輕把花枝嗅宿香蝶欲試飛猶護粉鶯初學囀尚羞簧
分明不得同君賞盡日傾心羨索郎

春雨即事寄襲美

陸

小謝輕埃日日飛小謝詠雨詩有散漫似輕埃句城邊江上阻春暉雖
愁野岫花房凍還得山家藥笋肥雙屐著頻看齒折敗
裘披苦見毛稀比隣釣叟無塵事灑笠鳴蓑夜半歸

次和

皮

織恨凝愁映鳥飛半旬飄灑掩韶暉山容洗得如烟瘦
地脉流來似乳肥野客正閒移竹遠幽人多病探花稀
何年細濕華陽道兩乘巾車相並歸

偶掇野蔬寄襲美

陸

野園烟裏自幽尋嫩甲香蕤引漸深行歇每依鷓鴣影
挑頻時見鼠姑心凌風藹彩初攜籠帶露虛疎或貯襟
欲助春盤還愛否不妨蕭灑似家林

魯望以躬掇野蔬兼示雅什用以酬謝

皮

杖擿春烟暖向陽煩君為我致盈筐深挑乍見牛脣液
爾雅云蕒牛脣一名水蔦細掐徐聞鼠耳香本草云葉似鼠耳莖亦可生食紫甲采
從泉脉畔翠牙搜自石根傍彫胡飯熟餽餽軟不是高
人不合嘗

次襲美見寄

陸

共尋花思極飛騰病帶春寒去未能烟徑水涯多好鳥

竹牀蒲椅但高僧須知日富為神授祇有家貧免盜憎
除却數函圖籍外更將何事結良朋

病後春思

皮

連錢錦暗麝氛氲荆思多才詠鄂君孔雀鈿寒窺沼見
石榴紅重墮堦聞牢愁有度應如月春夢無心祇似雲
應笑病來慙滿願花牋好作斷腸文

次和

陸

氣和靈府漸氤氲酒有賢人藥有君七字篇章看月得
百勞言語傍花聞閒尋古寺消晴日最憶深溪枕夜雲
早晚共搖孤艇去紫屏風外碧波文

館娃宮懷古

皮

艷骨已成蘭麝土宮墻依舊壓層崖
香徑泥銷露玉釵硯沼只留溪鳥浴
圖經云靈巖又名硯石山山頂有硯池
灑廊空信一作野花埋姑蘇麋鹿真閒事須為當時

一愴懷

次和

陸

鏤楣消落濯春雨蒼翠無言空斷崖草碧未能忘帝女
燕輕猶自識宮釵江山祇有愁容在劔珮應和愧色埋
賴有伍員騷思少吳王纔免似荆懷

襲美以紫石硯見贈以詩迎之

陸

霞骨堅來玉自愁珠成飛燕古釵頭澄沙郝天挺云脆
弱聞應伏青鐵拾遺記云張華著博物志成武帝賜青鐵硯是于闐國所獻者沉埋見

亦羞最稱風亭批碧簡好將雲竇漬寒流君能把贈問
吟客徧寫江南物家酬

以紫石硯寄魯望兼訓見贈

皮

樣如金蹙小能輕微潤將融紫玉英石墨一研爲鳳尾
寒泉半勺是龍睛騷人白芷傷心暗狎客紅筵奪眼明
兩地有期皆好用不須空把洗溪聲

同襲美遊北禪院

院即故司勳陸郎中舊宅

陸

連延花蔓映風廊岸幘披襟到竹房居士祇今開梵處
先生曾是草玄堂清樽林下看香印遠岫窓中挂鉢囊
今日有情消未得欲將名理問思光

奉和

皮

戚歷杉陰入草堂老僧雖見似相忘吟多幾轉蓮花漏
坐久重焚栢子香魚慣齋時分淨食鴿能閒處傍禪牀
雲林滿眼空羈滯欲對彌天却自傷

薔薇

陸

倚墻當戶自橫陳致得貧家似不貧外布芳菲雖笑日
中含芒刺欲傷人清香往往生遙吹狂蔓看看及四鄰
遇有客來堪玩處一端晴綺照烟新

次和

皮

誰繡連延滿戶陳暫應遮得陸家貧紅芳掩斂將迷蝶
翠蔓飄飄欲挂人低拂地時如墮鳥高臨墻處似窺鄰
祇應是董雙成戲剪得神霞寸寸新

奉和魯望新夏東郊閒泛見懷

皮

水物輕明淡似秋多情才子倚蘭舟
碧莎裳下攜詩草黃篋樓中挂酒
芻蓮葉蘸波初轉棹魚兒簇餌未
諳鈎共君莫問當時事一點沙禽勝
五侯

奉和魯望四月十五日道室書事

皮

望朝齋戒是尋常靜啓金根第幾
章竹葉飲爲甘露色蓮花鮓作肉
芝香松膏背日凝雲磴丹粉經年
染石牀剩欲與君終此志頑仙唯
恐鬢成霜

看壓新醅寄懷襲美

陸

曉壓槽牀漸有聲旋如荒澗野泉
清身前古態醺應出世上愁痕滴
合平飲啄斷年同鶴儉風波終日
看人爭

樽中若使常能淥兩綬通侯總強名

次和

皮

一簣松花細有聲旋將渠椀撇寒
清秦吳只恐荔來近劉項應須釀
得平酒德有神多客頌醉鄉無貨
没人爭五湖烟水郎山月合向樽
前問姓名

夏初訪魯望偶題小齋

皮

半里芳陰到陸家藜牀相勸飯胡
麻林間度宿拋棋局壁上經旬挂
釣車野客病時分竹米鄰翁齋日
乞藤花踟躕未放閒人去半岍紗
綃待月華

次和

陸

四鄰多是老農家百樹鷄桑半頃
麻盡趁清明脩網架

每和烟雨掉繚車啼鴛偶坐身藏葉餉婦歸來鬢有花
不是對君吟復醉更將何事送年華

重玄寺元達年逾八十好種名藥凡所植者

多至自天台四明包山句曲叢萃紛糅各可

指名余奇而訪之因題二章 皮

雨滌烟鋤偃僂賚詩法作偃破籬糾牙紅甲兩三畦藥名却笑

桐君少釋圓至云陶隱居本草序有桐君藥錄年紀翻

嫌竹祖低詩意謂桐君所錄不如上人種者之多白石靜敲蒸术火清泉間洗

種花泥怪來昨日休持鉢一尺彫胡似掌齊

又

香蔓蒙籠覆昔邪檜烟杉露濕袈裟石盆換水撈松葉

竹徑遷牀避笋芽藜杖移時挑細藥銅餅盡日灌幽花

支公漫道憐神駿不及今朝種一麻

奉和題達上人藥圃

陸

藥味多從遠客賚旋添花譜旋成畦三椹舊種根應異

九節初移葉尚低山莢便和幽澗石水芝須帶本池泥

從今直到清秋日又有香苗幾番齊

又

淨名無語示清羸藥草搜來喻更微一雨一風皆遂性

花開花落盡忘機教疏兔縷金絃亂鬼絲別名自擁龍芻紫

朮肥莫怪獨親幽圃坐病容銷盡欲依歸

以竹夾膝寄贈襲美

陸

截得篔簿冷似龍翠光橫在暑天中堪臨薤簟閒憑月
好向松窓臥跂風持贈敢齊青玉案醉吟徧稱碧荷筒
漆君雅具教多著爲著西齋譜一通

魯望以竹夾膝見寄因次韻酬謝 皮

圓于玉樹滑于龍來自衡陽彩翠中拂潤恐飛清夏雨
叩虛疑貯碧湘風大勝書客裁成簡頗賽溪翁截作筒
從此角巾因爾戴俗人相訪若爲通

夏景無事因懷章來二上人 皮

澹景微陰正送梅幽人避暑瘦楠杯水花移得和魚子
山蕨收時帶竹胎嘯館大都徧見月醉鄉終竟不聞雷
更無一事唯留客却被高僧怕不來

次和

陸

簷外青陽有二梅折來堪下凍醪杯離騷注云盛夏高
以醇酒置水上杉自欲生龍腦小弁誰能寄鹿胎麗事肯教饒沈謝談
微何必減宗雷還聞擬結東林社爭奈淵明醉不來

寄瓊州楊舍人 皮

德星芒彩瘴天涯酒樹堪消謫宦嗟行遇竹王因設奠
居逢木客又遷家清齋淨漉枕榔麪遠信閒封荳蔻花
清切會須歸有日莫貪勾漏足丹砂

奉和

陸

明時非罪謫何偏鵬鳥巢南更數千酒滿椰杯消毒露
風隨焦扇下瀧船人多藥戶行狂蠱吏有珠官出俸錢

唐詩苑英華卷三
祇以直誠天自信不勞詩句詠貪泉

奉和吳中書事寄漢南裴尚書

陸

風清地古帶前朝遺事紛紛未寂寥三泖涼波漁蕩動

遠祖士衡對晉武帝以三泖冬溫夏涼五茸春草雉媒嬌五茸吳王獵雲所草各有名

藏野寺分金刹月在江樓倚玉簫不用懷歸忘此景吳

王看即奉弓招

夏景冲澹偶然作

皮

祇隈蒲褥听烏紗味道澄懷景便斜紅印寄泉慚郡守

青筐與笋愧僧家茗爐盡日燒松子書案經時剥瓦花

園吏暫棲君莫笑不妨猶更著南華

又

一室無喧事事幽還如貞白在高樓天台畫得千迴看

湖日芳來百度遊湖日百蓮子也無限世機吟處息幾多身計

釣前休他年謁帝言何事請贈劉伶作醉侯

次和

陸

蟾雀參差在扇紗竹襟輕利籜冠斜鑪中有酒文園會

琴上無絃靖節家芝畹烟霞全覆穗橘洲風浪半浮花

閒思兩地忘名者不信人間髮解華

又

祇于池曲象山幽便是瀟湘浸石樓斜拂芡盤輕鷺下

細穿菱線小鯢遊閒開茗焙嘗須徧醉撥書帷臥始休

莫道仙家無好爵方諸還拜碧琳侯

送李明府之任南象

皮

五羊城在蜃樓邊墨綬垂腰正少年山靜不應聞屈鳥
草深從使翳貪泉蟬奴晴上臨潮檻燕婢秋隨過象船
一事與君消遠宦乳蕉花發訟庭前

奉和

陸

春盡之官直到秋嶺雲深處凭瀧樓居人愛近沉珠浦
候吏多來拾翠洲寶稅盡應輸紫貝蠻童多學佩金鈎
知君不戀南枝久拋却經冬白剝裘

寄題羅浮軒轅先生所居

皮

亂峰四百三十二羅浮山峯數欲問真君何處尋紅翠山鳥名
數聲瑤室響山有璇房瑤室七十有二真檀一炷石樓深山都遣負

沽來酒樵客客看化後金從此謁師知不遠求官先有

葛洪心

懷楊台文楊鼎文二秀才

陸

秋早相逢待得春崇蘭清露小山雲崇蘭小山郡中二堂寒花獨
自愁中見曙角多同醒後聞釣具每隨輕舸去詩題閒
上小樓分重思醉墨縱橫甚書破羊欣白練裙

秋賦有期因寄襲美

時將主試貢士

陸

雲似無心水似閒忽思名在貢書間烟霞免弃聊縣著
隣里漁舸暫解還文章病來猶滿篋藥苗衰後即離山
廣寒宮樹枝多少風送高低便可攀

病中秋懷寄襲美

病容愁思苦相兼清鏡無情未我嫌貪廣異疏行徑窄
故求偏藥出錢添同人散後休賒酒雙燕辭來始下簾
更有是非齊未得重憑詹尹拂龜占

次和

皮

貧病于君亦太兼才高應亦被天嫌因分鶴料家資減
爲置僧餐口數添靜裏改詩空凭几寒中注易不開簾
清詞一一侵真宰甘取窮愁不用占

初冬偶作寄南陽潤卿

皮

寓居無事入清冬雖設樽罍酒半空白菊爲霜翻帶紫
蒼苔因雨却成紅迎潮預遣收魚笱防雪先教蓋鶴籠
唯待支硯最寒夜共君披氅訪林公

庚寅歲十一月新羅弘惠上人與本國同書
請日休爲靈鷲山周禪師碑將還以詩送之

皮

三十麻衣弄渚禽豈知名字徹鷄林勒銘雖卽多遺草
越彙還能抵萬金鯨鬣曉掀峰正燒鰲睛夜沒島還陰
二千餘字終天別東望辰韓淚灑襟

奉和

陸

一函迢遞過東瀛祗爲先生處乞銘已得雄詞封靜檢
却懷孤影在禪庭春過異國人應寫夜讀滄洲怪亦聽
遙想勒成新塔下盡望空碧禮文星

和襲美題支山南峰僧

陸

唐詩英華卷十九

眉毫霜細欲垂肩
自說初棲衆嶽年
萬壑烟霞秋後到
一林風雨夜深禪
時翻貝葉添新藏
閒插松枝護小泉
好是清冬無外事
匡牀齋罷向陽眠

和張處士詩

并序

陸

張祜字承吉元和中作宮體小詩辭曲艷發當時輕薄之流能其才合譟得譽及老大稍窺建安風格誦樂府錄知作者本意短章大篇往往問出諫諷怨謫時與六義相左右善題目佳境言不可刊置別處此爲才子之最也由是賢俊之士及高位重名者多與之游謂有鵠鷺之野孔翠之鮮

竹栢之貞琴磬之韻或薦之于天子書奏不下亦受辟諸侯府性狷介不容物輒自効公以曲阿地古澹有南朝之遺風遂築室種樹而家焉性嗜水石嘗悉力致之從知南衆間罷職載羅浮石筍還不蓄善田利產爲身後計死未二十年而故姬遺孕凍餒不暇前所謂鵠鷺孔翠竹栢琴磬之家雖朱輪尚棄遺編尚吟未曾一省其孤而恤其窮也噫人假之爲翫好不根于道義耶懼其怨刺于神明耶天果不愛才沒而猶譴耶吾一不知之友人顏弘至行江

南道中訪其廬作詩弔而序之屬予應和
予汨沒者不足哀承吉之道邀襲美同作
庶乎承吉之孤倚其傳而有憐者

勝華通子共悲辛荒徑今爲舊宅鄰一代交遊非不貴
五湖風月合教貧魂應絕地爲才鬼名與遺編在史臣
聞道平生偏愛石至今猶泣洞庭人

魯望憫承吉之孤爲詩序邀予屬和欲用予
道振其孤而利之噫承吉之困身後乎魯望
視予困與承吉生前孰若哉未有已困而能
振人者然抑爲之辭用塞良友之意

皮

先生清骨葬烟霞業破孤存孰爲嗟幾篋詩編分貴位
一林石笋散豪家兒過舊宅啼楓影姬繞荒田泣稗花
唯我共君堪便戒莫將文譽作生涯

寄潤卿博士

高眠可爲要玄纁鵲尾金爐一世焚陶貞白有金爐塵外
鄉人爲許掾山中地主是茅君將收芝菌唯防雪欲曬
圖書不奈雲若便華陽終臥去漢家封禪用誰文

懷華陽潤卿博士

鳳骨輕來稱瘦容華陽館主未成翁陶隱居昔爲華陽館主數行
玉札存心久一掬雲漿漱齒空白石煑多熏屋黑丹砂
埋久染泉紅他年欲事先生去十賚須加陸逸冲逸冲嘗事

隱居隱居錫名樓靜處
士十賚猶人間九錫也

幽居有白菊一叢因而成詠呈一二知己

陸

還是延年一種材菊之別名即將瑤朶冒霜開不知紅艷臨

歌扇欲伴黃英入酒盃陶令接羅堪听著梁王高屋好

欵來梁朝有白紗高屋帽月中若有閒田地為勸嫦娥作意栽

華亭鶴聞之舊矣及來吳中以錢半千得一

隻養之殆經歲不幸為飲啄所誤經夕而卒

悼之不已遂繼以詩南陽潤卿博士浙東德

師侍御毘陵魏不琢處士東吳陸魯望秀才

及厚于予者悉寄之請垂見和 皮

池上低摧病不行誰教仙魄反層城陰苔尚有前朝跡

皎月新無昨夜聲菰米正殘三日料筠籠休礙九霄程

不知此恨何時盡遇著雲泉即愴情

奉和

陸

一夜圓吭絕不鳴八公虛道得千齡方添上客雲眠思

忽伴中仙劍解形但掩叢毛穿古堞永留寒影在空屏

君才幸自清如水更向芝田為刻銘

奉送浙東德師侍御罷府西歸

陸

王謝遺踪玉籍仙三年閒上鄂君船詩懷白閣僧吟苦

俸買青田鶴價偏行次野楓臨遠水醉中衰菊臥涼烟

芙蓉散盡西歸去唯有山陰九萬牋

褚家林亭

皮

廣亭遙對舊娃宮竹島蘿溪委曲通
茂苑樓臺低檻外太湖魚鳥徹池中
蕭疎桂影移茶具狼籍蘋花上釣筒
爭得共君來此住便披鶴氅對清風

奉和

陸

一陣西風起浪花遶欄干下散瑤華
高窻曲檻仙侯府臥葦荒芹白鳥家
孤島待寒凝片月遠山終日送餘霞
若知方外還如此不要乘秋上衆槎

送圓載上人歸日本國

皮

講殿談餘著賜衣椰帆却返舊禪扉
貝多紙上經文動如意瓶中佛爪飛
颺母影邊持戒宿波神宮裏受齋歸

家山到日將何入白象新秋十二圍

顏萱

紀事云字弘至江南進士也與皮陸唱和詩載

松陵集

過張祐處士丹陽故居

并序

萱與故張處士祐世家通舊尚憶孩稚之
歲與伯氏嘗承處士撫抱之仁日管輅爲
神童期孔融于偉器光陰徂謝二紀于茲
適經其故居已易他主訪遺孤之所止則
距故居之右二十餘步荆榛之下葦門啓
焉處士有四男一女男曰椿兒桂子椅兒

杞兒問之三已物故唯杞爲遺孕與其女
尚存欲揖杞與言則又求食於汝墳矣但
有霜鬢而黃冠者杖策迎門乃昔時愛姬
崔氏也與之話舊歷然可聽嗟乎葛帳練
裙兼非所有琴書圖籍盡屬他人又云橫
塘之西有故田數百畝力既貧窶十年不
耕唯歲賦萬錢求免無所嗚呼昔爲穆生
置醴鄭公立鄉者復何人哉因吟五十六
字以聞好事者

憶昔爲兒逐我兄曾拋竹馬拜先生書齋已換當時主
詩壁空題故友名豈是爭權留怨敵可憐當路盡公卿

柴扉草屋無人問猶向荒田責地征

送圓載上人歸日本

師來一世恣經行却向滄波問去程心靜已能防渴鹿
輦喧時爲駭長鯨師云每遇鯨舟人必鳴鼓而恐之禪林幾結金桃重
日本有金桃實重一斤梵室重修鐵瓦輕以鐵爲瓦料得還鄉無輕于陶者

張賁

紀事云字潤卿南陽人登大中進士第唐末爲
廣文博士寓吳中與皮陸游

訓襲美先輩

尋疑天意喪斯文故選茅峰寄白雲酒後只留滄海客

香前唯見紫陽君近年已絕詩書癖今日兼將筆硯焚
為有此身猶苦患不知何者是玄纁

和陸魯望咏白菊

雪彩冰姿號女華寄身多是地仙家有時南國和霜立
幾處東籬伴月斜謝客瓊枝空貯恨袁郎金鈿不成夸
自令終古清香在更出梅妝弄晚霞

悼鶴和襲美

池塘蕭索掩空籠玉樹同嗟一土中莎徑罷鳴唯泣露
松軒休舞但悲風丹臺舊斃難重緝紫府新書豈更通
雲滅霧消無處問只留華髮與衰翁

和襲美傷開元觀顧道士

鳳麟膠盡夜如何共歎先生劒解多幾度弔來唯白鶴
此時乘去必青驃圖中含景隨殘照琴裏流泉寄逝波
悵望真靈又空返玉書誰授紫微歌

和襲美褚家林亭

疎野林亭震澤西朗吟閒步喜相攜時時風折蘆花亂
處處霜摧稻穗低百本敗荷魚不動一枝寒菊蝶空迷
今朝偶得高陽伴從放山公醉似泥

李穀一作穀

紀事云字德師隴西人咸通進士也唐末為浙
東觀察推官兼殿中侍御史

浙東罷府西歸酬別張廣文皮先輩陸秀才

豈有頭風筆下痊浪成蠻語向初筵蘭亭舊址雖曾見
柯笛遺音更不傳昭曜文星吳分野留連花月晉名賢
相逢只恨相知晚一曲驪歌又幾年

司馬都

和陸魯望咏白菊

恥共金英一例開素芳須待早霜催
遶籬看見成瑤圃泛酒初迷傍玉盃
映水好將蘋作伴犯寒疑與雪為媒
夫君每尚風流事應為徐妃致此裁

鄭壁

紀事云唐末江南進士也與皮陸唱酬

和陸魯望咏白菊

自艷輕明帶露痕始知佳色重難群
終朝凝笑梁王雪盡日慵飛蜀帝雲
燕雨似翻瑤渚浪雁風疑卷玉綃紋
瓊妃若會寬裁翦堪作蟾宮夜舞裙

和襲美傷開元觀顧道士

斜漢銀瀾一夜東飄飄何處五雲中
空留華表千年約纔畢丹爐九轉功
形蛻遠山孤壙月影寒深院曉松風
門人不覩飛升去猶與浮生哭恨同

魏朴

紀事云唐末吳中名士也

按皮集朴字不琢毘陵人

和皮襲美悼鶴

直欲裁詩問杳冥豈教靈化亦浮生
風林月動疑留魄

沙島烟愁似蘊情雪骨夜封蒼蘚冷練衣寒在碧塘輕
人間飛去猶堪恨况是泉臺遠玉京

李洞

晁公武云字才江京兆人昭宗時不第遊蜀卒
○全唐詩話云唐諸王孫也慕賈浪仙爲詩鑄
其像事之如神嘗念賈島佛所作詩人多誦其
僻澁不能貴其奇峭惟吳子華深知之子華才
力浩大八面受敵嘗以百篇示洞洞曰大兄所
示百篇中有一聯絕唱西昌新亭曰暖漾魚遺
子晴遊鹿引麝子華不怨所鄙而喜所許○藝
文志云詩一卷集賈島句圖一卷

贈曹郎中崇賢所居

閑坊宅枕穿宮水聽水分衾蓋蜀繒藥杵聲中搗殘夢
茶鐺影裏煮孤燈刑曹樹蔭千年井華岳樓開萬仞冰
詩句變風宮漸緊夜濤春斷衆邊藤

上司空員外

禪心高臥似疎慵詩客經過不厭重藤杖幾攜量積雪
玉鞭曾把數嵩峰夜眠古巷當城月秋直清曹入省鐘
禹鑿故山歸未得河聲暗一作老雨三松

春日隱居官舍感懷

風吹燒燼雜汀沙還似青溪舊寄家入戶竹生牀下葉
隔窻蓮謝鏡中花苔房毳客論三學雪嶺巢禽看兩衙

銷得人間無限事江亭月白誦南華

廢寺閑居寄懷一二罷舉知己

病居廢廟冷吟烟無力爭飛類病蟬槐省老郎蒙主棄
月陂孤客望誰憐稅房兼得調猿石租地曾分浴鶴泉
處世堪驚又堪愧一坡山色不論錢

題尼大德院

雲鬢早歲斷金刀戒律曾持五百條臺上燈紅蓮葉密
眉間毫白黛痕銷繡成佛國銀為地畫出玉城雪覆橋
清淨高樓松檜寺世雄翻愧自低腰

懷張喬張霞

西風吹雨葉還飄憶我同袍隔衆濤江塔眺山青入佛

邊城覆雪白連鷗身離世界歸天竺影挂虛空度石橋
應念無成獨流轉懶磨銅片鬢毛焦

華山

碧山長凍地長秋日夕泉源聒華州萬戶烟侵關令宅
四時雲在使君樓風驅雷電臨河震鶴引神仙出月遊
峰頂高眠靈藥熟自無霜雪入人頭

贈龐鍊師

女人

家住涪江漢語嬌一聲歌愛玉樓簫腫融春日柔金縷
粧發秋霞戰翠翹兩臉酒醺紅杏妬半霄酥嫩白雲饒
若能攜手隨仙令皎皎銀河渡鵲橋

病猿

瘦纏金鎖惹朱樓一別巫山樹幾秋寒想蜀門清露滴
暖懷湘岬白雲流罷拋簷果沉僧井休拗崖冰濺客舟
啼過三聲應有恨畫堂深不徹王侯

斃驢

蹇驢秋斃瘞荒田忍把敲吟舊竹鞭三尺焦桐才調集作桐輕
背殘月一條藜杖才調集作藤瘦卓寒烟通茭白浪寬圍國倚
蜀青山峭入天如畫衆門措肘望一作看阿誰家一作教賣
釣魚船

東川高僕射

油幢影裏拜清風十里貔貅一片雄三印鎖開霜滿地
四門關定月當空泉浮山葉人家過詔惹爐香鳥道通

新起畫樓攜客上絃歌筵內一作近

一作衆榴紅

平曹監

宅上愁雲吹不散桂林詩骨葬雲根滿樓山色供鄰里
一洞松聲付子孫甘露施衣封淚點秘書取集印苔痕
吟魂醉魄歸何處御水鳴鳴夜遶門

贈長安畢郎中

高門寒沼水連雲鷺識朱衣傍主人地肺半邊晴帶雪
天街一面靜無塵朝迴座客酬琴價衙退留僧寫鶴真
從此幾遷爲計相蓬萊三刻奏東巡

寄東蜀幕中友

官亭池碧衆榴殷遙想清才倚畫欄桺絮漲天籠地暖

角聲經雨透雲寒曉侵台座香烟濕夜艸軍書蠟炬乾
爲話門人吟太苦風摧蘭秀一枝殘

曲江漁父

兒孫閑弄雪霜髯浪颭南山影入簷閑臥篷舟龜作枕
病來茆舍網爲簾值春游子憐尊滑通蜀行人說鱸甜
數尺寒絲一竿竹豈知浮世有猜嫌

唐詩英華卷十六目錄終

唐詩英華卷十七目錄

友人
葉雷生 金是瀛
陳廷會 周安 叅輯

晚唐七

曹唐 四十五首 李昭象 一首

鄭谷 二十六首 韓喜 二首

崔塗 九首 張蠟 六首

王鐸 一首 李山甫 十五首

胡駢 一首 褚載 一首

杜荀鶴 九首 高蟾 一首

姚揆 一首 嚴郾 一首

盧尚卿 一首


蘇廣文 三首

周朴 四首

唐詩英華卷十七目錄 終

唐詩英華卷十七

吳江顧有孝茂倫編

晚唐七 

曹唐

紀事云字堯賓桂州人初為道士後為使府從事咸通中卒作遊仙詩百餘篇其友人曰堯賓曾作鬼詩唐曰何也曰水底有天春寂寂人間無路月茫茫非鬼詩而何唐大哂又云唐寓江陵佛寺寺有亭沼唐得水底一聯明日還坐沼上有二婦人素裳徐步詠所得之詩唐迫而訊之不應未十步而沒數日唐亦殂竟不成名○

郝天挺云太和中舉進士因暴疾卒于家○藝
文志云詩三卷

三年冬大禮

皇帝齋心潔素誠自朝真祖報升平華山秋艸多歸馬
滄衆寒波絕洗兵銀箭水殘河影斷玉爐烟盡月華生
千官整肅三天夜劔珮初聞入太清

又

兼日西飛渡禁林太清宮殿月沉沉不聞北斗傾堯酒
空覺南薰入舜琴歌壓鈞天閒夢盡詔歸秋水道情深
雪風更起古杉葉時送步虛清磬音

又

太乙天壇降大君屬車龍鶴夜成群春浮玉藻寒初落
露拂金莖曙欲分三代樂回風入律四溟歌駐水成文
千官不動旌旗下日昭南山萬樹雲

又

山擁飛雲衆水清天壇未夕仗先成千官不起金滕議
萬國空瞻玉藻聲禁火曙燃香焰裊宮衣寒拂雪花輕
側聞左右皆周呂看取從容致太平

漢武帝思李夫人

惆悵朱顏不復歸晚秋黃葉滿天飛迎風細苻傳香粉
隔水殘霞見畫衣白玉帳寒鴛夢絕紫陽宮遠雁書稀
夜深池上蘭橈歇斷續歌聲接太微

漢武帝將候西王母下降

此曹唐大遊仙詩也鼓吹作朱邕不

知何據

崑崙凝想最高峰
王母來乘五色龍
歌聽紫鸞猶縹緲
語來青鳥許從容
風迴水落三清月
漏苦霜傳五夜鐘
樹影悠悠花悄悄
若聞簫管是行蹤

漢武帝于宮中讌西王母

鼇岫雲低太乙壇
武皇齋潔不勝懽
長生碧字期親署
延壽丹泉許細看
劍珮有聲宮樹靜
星河無影禁花寒
秋風裊裊月朗朗
玉女清歌一夜闌

劉晨阮肇遊天台

樹入天台石路新
細雲和雨動無塵
烟霞不是生前事

水木空疑夢後

裏

一作

身往往鷄鳴巖
下月時時犬吠洞

中春不知何地歸
依處須就桃源問主人

劉阮洞中遇仙子

天和樹色靄蒼蒼
霞重嵐深路渺茫
雲竇滿山無鳥雀
水聲沿澗有笙簧
碧沙一作溪洞裏乾坤別
紅樹枝前日月長
願得花間有人出
不令仙犬吠劉郎

仙子送劉阮出洞

殷勤相送出天台
仙境那能却再來
雲液既歸須強飲
玉書無事莫頻開
花當洞口應長在
水到人間定不迴
惆悵溪頭從此別
碧山明月照蒼苔

仙子洞中有懷劉郎

唐詩英華卷七

不將清瑟理霓裳。塵夢那知鶴夢長。洞裏一作水底有天春
寂寂一作漠漠人間無路月茫茫。玉沙瑤草連溪碧。流水桃
花滿澗香。曉露風燈零落盡。品彙作易零落此生無處訪品彙作問

劉郎

劉阮再到天台不復見仙子

再到天台訪玉真。青苔白石已成塵。笙歌寂寞閑才調集作

惟滾洞雲鶴。蕭條絕舊隣。艸樹總非前度色。烟霞不似

往昔一作年春。桃花流水依然在。不見當時勸酒人。

織女懷牛郎

北斗佳人雙淚流。眼穿腸斷為牽牛。封題錦字凝新恨。
拋擲金梭結舊愁。桂樹參天雲漠漠。銀河一帶水悠悠。

欲將心向文苑英華作就仙郎說。借問榆花早晚秋。

玉女杜蘭香下嫁於張碩

天上人間兩渺茫。不知誰嫁杜蘭香。來經玉樹三山遠。
去隔銀河一水長。怨入清塵愁錦思。酒傾玄露醉瑤觴。
遺情更說何珍重。擘破雲鬟金鳳凰。

張碩重寄杜蘭香

碧落香銷蘭露秋。星河無夢夜悠悠。靈妃不降三清駕。
仙鶴空成萬古愁。皓月隔花追歎別。飛烟籠樹省淹留。
人間何事堪惆悵。一作遺恨兼色西風十二樓。

簫史携弄玉上昇

豈是丹臺歸路遙。紫鸞烟駕不同飄。一殼雒水傳幽咽。

萬片宮花共寂寥紅粉美人愁未散清華公子笑相邀
緱山碧樹青樓月腸斷春風爲玉簫

皇初平將入金華山

莫道真遊烟景賒瀟湘有路入金華溪頭鶴樹春常在
洞口人家日易斜一水暗迴閑繞澗五雲長往不還家
白羊成隊難收拾喫盡溪邊巨勝花

廣雅云巨勝一名胡麻陶隱居云莖方者巨勝圓者胡麻可作蔬道人多食之形類麻故名

王遠讌麻姑蔡經宅

好風吹樹杏花香花下真人道姓王大篆龍蛇隨筆札
小天星斗滿衣裳閑拋南極歸期晚笑指東溟飲興長
要喚麻姑同一醉使人沽酒向一作餘杭下

萼綠華將歸九疑留別許真人

九點秋烟黛色空綠華歸思頗無窮每悲馭鶴身難住
長恨臨霞語未終河影暗吹雲夢月花敲閒落洞庭風
藍絲重勒金條脫留與人間許侍中

穆王讌王母于九光流霞館

桑葉扶疎閉日華穆王邀命讌流霞霓旌著地雲初駐
金奏掀天月欲斜歌咽細風吹粉蕊飲餘一作酬清露濕
瑤砂不知白馬紅韁解偷喫東田碧玉花

紫河張休真

琪樹扶疎壓瑞烟玉皇朝客滿花前山川到處成三月
絲竹經時卽萬年樹石冥茫初縮地盃盤狼籍未朝天

東風小飲人皆醉從聽黃龍枕一作水眠

送羽人王錫歸羅浮

風前整頓紫荷集作霞巾裳集作歸向羅浮保集作報養神石

磴倚天行帶月鐵橋通衆入無塵一作津龍蛇出洞閑邀

雨犀象眠花不避人最愛葛洪尋藥處露苗烟藥一作雨

滿山春

送劉尊師祇詔闕庭

衆風葉葉駕霓旌天路悠悠接上清錦誥淒涼遺去恨

玉簫哀絕醉離情五湖夜月幡幢濕雙闕清風劔珮輕

從此集作莫道暫辭華表柱更集作已應千載是歸程

又

五峰已集作此別隔人間雙闕何年許再還既掃山川收

地脉須留日月駐天顏霞觴共飲身雖在風馭今集作難

陪跡未閑從此枕中唯集作難有夢夢魂何處訪三山

又

仙老閑眠碧艸堂帝書徵入白雲鄉龜臺欲署長生籍

鸞殿要論不死方葦露想傾延命酒素烟思蕤降真香

五千言外無文字更有何詞贈武皇

暮春戲贈吳端公

年少英雄好丈夫大家望拜從金吾閑眠曉日聽鸚鵡

笑倚春風仗輓轡深院吹笙聞漢婢靜街調馬任奚奴

牡丹花下簾鈎外獨凭紅肌捋虎鬚

和周侍御買劍

將軍溢價買吳鉤要與中原靜
冠讐試掛窗前驚電轉
略拋牀下怕泉流青天露拔雲
霓泣黑地潛擎鬼魅愁
見說夜深星斗畔等閑期尅月
支頭

長安春舍叙邵陵舊讌懷永門蕭使君

邵陵佳樹碧葱龍河漢西沉讌未
終殘漏五更傳衆用
清笳三會揭天風香薰舞席雲髮
綠光射頭盤蠟燭紅
今日却懷行樂處兩牀絲竹水樓
中

又

不知何路却飛翻虛受賢侯鄭重
恩五夜清歌敲玉樹
三年洪飲倒金尊招攜永感雙魚
在報荅空知一劍存

狼籍梨花滿城月當時長醉信陵門

又

粉雉丹軒畫障西水雲紅樹窳璇
題鷓鴣欲絕歌聲定
鷓鴣初驚舞袖齊坐對玉山難才調集
甸線細聽金石
怕低迷東風夜月三年飲不省歸
時不似泥

又

木魚金鑰鎖重城夜上紅集作江
樓縱酒情竹箭一作葉水
繁更漏促桐花風軟管絃清百分
散打銀盆溢十指寬
催玉筋輕星斗漸稀賓客散碧雲
猶戀艷歌聲

又

三年身逐楚諸侯賓榻容居最上
頭飽聽笙歌陪夜飲

熟尋雲水縱閑遊朱門鎖閉烟霞暮鈴集作紫閣清泠水

木秋月滿前山圓不動更邀詩客上高樓

病馬呈鄭校書章三吳十五先輩各本無下七字

騷騷何年別渥洼病來顏色半泥一作塵沙四蹄不鑿金

砧裂雙眼慵開玉筋斜墮月兔毫乾敲敲失雲龍骨瘦

查牙紀事作牙槎平原好放無人放嘶向秋風首藉花

又

隴上沙葱葉未齊騰黃猶自跼羸蹄尾蟠夜雪一作雨紅

絲脆頭棹秋風白練低力憊自思金絡腦影寒空望錦

障泥堦前莫怪雙垂淚不遇孫陽不敢嘶

又

不剪隻毛鬣半翻何人別一作識是古龍孫風吹一作雪侵病

骨無驕氣土蝕葱一作驄花一作花見臥痕未噴斷

雲歸漢苑曾追一作飛輕練過吳門一朝千里心猶在爭

肯潛忘秣飼恩

奉送嚴大夫再領容府

衆風捲樹凍嵐消憂國寧辭嶺外遙自顧勤勞甘百戰

不將功業負三朝劔澄黑水曾芟虎箭劈黃雲慣射鷗

代北天南盡成事肯將心許霍嫖姚

又

日照雙旌射火山嶺表錄云梧州西有火山下有澄潭

十餘丈或言水中有寶珠也燭如火山笑迎賓從却南

產荔枝四月子丹以其地熱故曰火山

唐詩英產卷七八

還風雲暗發談諧外感會潛生氣槩間
蕪竹水翻臺榭濕刺桐花落管絃閑
無因得鞞真珠履親從新侯定八
蠻

贈南嶽馮處士

白石溪邊自結廬風泉滿院稱幽居
鳥啼深樹斲靈藥花落閑窓看道書
烟嵐晚過鹿裘濕水月夜明山舍虛
支頤冷笑緣名出終日王門強曳裾

又

寂寥深木閉烟霞洞裡相知有幾家
笑看潭魚吹水沫醉噴溪鹿吃蕉花
穿厨歷歷泉聲細繞屋悠悠樹影斜
夜靜著灰封釜竈自添文武養丹砂

題子姪書院雙松

自種雙松費幾錢頓令院落似秋天
能藏此地新晴雨却惹空山舊燒烟
枝壓細風過枕上影籠殘月到牕前
莫教取次成閑夢使汝悠悠十八年
三國志丁公固幼時夢松生其腹謂

人曰松字乃十八公也後十八年吾其為公平卒如夢兆

羽林賈中丞

四十年前百戰身曾驅虎隊掃胡塵
風悲鼓角榆關暮日暖旌旗隴艸春
鐵馬慣牽邀上客金魚多解乞去聲
佳入胸中別有安邊計誰采髭鬚白似銀

送康祭酒赴輪臺

灞水橋邊酒一杯送君千里赴輪臺
霜黏象眼旗聲凍

風射犀文甲縫開斷磧簇烟山似米野營軒地鼓如雷
分明會得將軍意不斬樓蘭不擬迴

南遊

盡興南遊卒未迴水工舟子不須催政思碧樹關心句
難放紅螺蘸甲杯漲乘潮生陰火滅蒼梧風暖瘴雲開
蘆花寂寂月如練何處笛聲江上來

哭陷邊許兵馬使

北風裂地黯邊霜戰敗桑乾日色黃故國暗迴殘士卒
新墳空葬舊衣裳散牽細馬嘶青草任公佳人弔白楊
除却陰符與兵法更無一物在儀牀

李昭象

紀事云字化文池州刺史方玄之子父卒因家
焉懿宗末年以文干相國路公巖問其年曰十
有七矣巖年尚少尤器重之薦于朝將召試會
巖貶遂還秋浦移居九華與張喬顧雲輩爲方
外交龍紀中楊行密奔宣州以書招之不從

題顧正字谿居

高敞吟軒近釣灣塵中來似出人間若教明月休生桂
應得危時共掩關春酒夜碁難放客短籬疎竹不遮山
莫誇恬澹勝榮祿雁引行高未許閒

鄭谷

紀事云字若愚袁州人故永州刺史之子幼年

司空圖與刺史同院見而奇之曰曾吟得丈夫
詩否曰吟得莫有病否曰丈夫曲江晚望斷篇
云村南斜日閒回首一對鴛鴦落渡頭卽深意
矣司空嘆惜撫背曰當爲一代風騷主乾寧中
爲都官郎中卒于家谷自叙云故許昌薛尚書
爲都官郎中後數年建州李員外頻自憲府拜
都官員外皆一時騷雅宗師都官之曹振盛於
此余受早知今忝此官復是正秩何以相繼前
賢耶又云幼受知於李公明馬博士戴求試春
闈故薛許昌能李建州頻不以晚輩見待遊舉
場十六年著述千餘首乾寧初上幸三峰朝謁

多暇止雲臺道舍遂拾墜補遺成三百首目爲
雲臺編○藝文志云雲臺編三卷又宜陽集三
卷○葛立方云今之新進士不問科甲高下唱
名出皇城例唱狀元莫知其端唐鄭谷登第後
宿平康里嘗作詩云春來無處不閒行楚潤相
看別有情好是五更殘酒醒耳邊聞喚狀元聲
則新進士例呼狀元舊矣鄭谷趙昌翰榜第八
名也

鷓鴣谷以此詩得名
時號爲鄭鷓鴣

暖戲煙蕪錦翼齊品流應得近山雞雨昏青草湖邊過
花落黃陵廟裏啼遊子乍聞征袖濕佳人纔唱翠眉低

唐詩苑英華卷之七
相呼相喚湘江曲苦竹叢深春日西

少華甘露寺

石門蘿逕與天隣雨檜風篁遠近聞
飲澗鹿喧雙派水上樓僧踏一梯
雲孤烟薄暮關城沒遠色初晴澗
曲分長欲燃燈來此宿北林猿鶴
舊同群

渚宮亂後作

鄉人來話亂離情淚滿殘陽問楚
荆白社已應無故老清江依舊遶
孤城高秋軍旅齊山樹昔日漁家
盡野營牢落故園征戰後黃花綠
蔓上墻生

江際

杳杳漁舟破暝烟疎疎蘆葦舊江
天那堪流落逢搖落

可得潜然是偶然萬頃白波迷宿
鷺一林黃葉送寒詩法

秋作蟬兵車未息年華促早晚閑
吟向滄川

宗人作尉唐昌官署幽勝而又博
學精富得以言談將欲他之留書
屋壁

公堂瀟灑有林泉祇隔苔墻是渚
田宗黨相親離亂世春秋閑論戰
爭年遠江驚鷺來池口絕頂歸雲
過竹邊風雨夜長同一宿舊遊多
共憶樊川

漢陂

昔事東流共不回春深獨向漢陂
來山一作亂前別業依稀在雨裏
梨花寂寞開却展魚絲無野艇舊
題詩句沒蒼苔潜然回顧難消遣
祇有佯狂泥酒杯

寄贈孫路處士

平生詩譽更誰過
歸老東吳命若何
知己凋零垂白髮
故園寥落近滄波
酒醒蘚砌花陰轉
病起漁舟鷺跡多
深入富春人不見
閑門空掩半庭莎

舟行

九派迢迢九月殘
舟人相語且相寬
村逢好處嫌風便
酒到醒來覺夜寒
蓼水白波喧夏口
柿園紅葉憶長安
季鷹可是思鱸膾
引退知時自古難

遊蜀

所向明知是暗投
兩行清淚語前流
雲橫新塞一作塞遮秦甸
鼓吹作水花落空山入閩州
不分黃鸝驚曉夢
惟應杜

宇信

集作起

春愁梅黃麥綠無歸處
可得漂漂愛浪遊

中年

漠漠秦雲淡淡天
新年景象入中年
情多最恨花無語
愁破方知酒有權
苔色滿墻思故第
雨聲入夜憶春田
衰遲自喜添詩學
更把前題改數聯

慈恩偶題

往事悠悠成一作添浩嘆
浮生擾擾竟何能
故山歲晚不歸去
高塔晴來獨自登
林下聽經秋苑一作院鹿溪邊掃
葉夕陽僧吟餘却起
雙峰念曾看菴西瀑布冰

石城

石城昔為莫愁鄉
莫愁魂散石城荒
江人依舊棹舴艋

江岸還飛一作雙飛雙飛一作鴛鴦帆去帆來風浩渺花開
謝春悲涼烟濃草遠望不盡千古漢陽閒夕陽

感懷投時相

非才偶忝直文昌兩鬢年深一鏡霜待漏敢辭稱小吏
立班猶未出中行孤吟馬跡拋槐陌遠夢漁竿擲葦鄉
丞相舊知爲學苦更教何處貢篇章

侯家鷓鴣

江天梅雨濕江籬此處烟香是此時苦竹嶺無歸去日
兼棠花落舊棲枝春宵思極蘭燈暗曉月啼多錦幕垂
唯有佳人憶南國殷勤爲爾唱愁辭

益州

兼棠風外獨霑中襟袖無端染蜀塵和暖又逢挑菜日
寂寥未是采一作探花人不嫌泥酒衝愁陣却憶漁簑覆
病身何事晚來微雨過錦江春似曲江春

峽中嘗茶

簇簇新英摘露光小江園裏火前嘗吳僧謾說鴉山好
蜀客休誇烏觜香入座半甌輕泛綠開緘數片淺含黃
鹿門病客不歸去酒渴更知春味長

京師冬暮詠懷

覓句干名祇自勞苦吟殊未補風騷烟開水國花期近
雪滿長安酒價高舊業已荒青靄逕寒江空憶白雲濤
不知春到情何限惟恐流年損鬢毛

同志顧雲下第往京偶有寄勉

鳳策聯華

按文獻通考鳳策聯華三卷顧雲行卷之文也

是國華春來偶未上

仙槎鄉連南渡思菰米淚滴東風避杏花吟聒暮鶯歸

廟院睡消遲日寄僧家一般情緒應相信門靜莎深樹

影斜

獻制誥楊舍人

為郡東吳祗飲冰瑣闈須降鳳書徵隨行已有朱衣吏

伴直多招紫閣僧窗下調琴鳴遠水簾前睡鶴背秋燈

葦陂竹塲情無限閒話毗陵問杜陵

漂泊

槿墜蓬疎池館清日光風緒澹無情鱸魚斫膾輸張翰

橘樹呼奴羨李衡十口漂零猶寄食兩川消息未休兵

黃花催促重陽酒何處登高望二京

蠟燭

仙漏遲遲出建章宮簾不動透清光金闈露白新裁詔

畫閣春紅正試粧淚滴盃盤何所恨燼飄蘭麝暗和香

多情更有分明處昭得歌塵下燕梁

次韻和秀上人長安寺居言懷寄渚宮禪者

舊齋松老別多年香社人稀喪亂間出寺祗知趨內殿

閉門長似在深山臥聽秦樹秋鐘斷吟想荆江夕鳥還

惟恐興來飛錫去老郎無路更追攀

蜀中

馬頭春向鹿頭關遠樹平蕪一望閒雪下文君沽酒市
雲藏李白讀書山江樓客恨黃梅後村落人歌紫芋間
隄月橋燈好晴景漢庭無事不征蠻

九日偶懷寄左省張起居

令節爭歡我獨閒荒臺盡日向晴山渾無酒泛金英菊
謾道官趨玉笋班深愧青莎迎野步不堪紅葉映衰顏
羨君官重多吟興醉帶南陂落照還

擢第後入蜀經羅利路見衆棠盛開偶有題

詠

上國休誇紅杏艷深溪自照綠苔磯一枝低帶流鶯睡
數片狂和舞蝶飛堪恨路長移不得可無人與畫將歸

手中已有新春桂多謝烟香更入衣

次韻和禮部盧侍郎江上秋夕寓懷

盧郎到處覺風生蜀郡留連亞相情亂後江山悲庾信
夜來烟月屬袁宏夢歸蘭省寒星動吟向莎洲宿鷺驚
未脫白衣頭半白叨陪屬和倍爲榮

韓喜

水

方圓不定性空求東注滄溟早晚休高截碧塘長耿耿
遠飛青嶂更悠悠瀟湘月浸千年色夢澤烟含萬古愁
別有隴頭嗚咽處爲君分作斷腸流

松

倚空高樹冷無塵往事閑徵夢欲分翠色本宜霜後見
寒聲偏向月中聞啼猿想帶蒼山雨歸鶴應一作和紫
府雲莫向東園競桃李春光還是不容君

崔塗

藝文志云字禮山光啓進士第詩一卷

途中秋晚送友人歸江南

又指烟波算路岐此生多是厭羈離正逢搖落仍須別
不待登臨已合悲里巷半空兵過後水雲初冷雁來時
扁舟未得如君去空向滄江夢所思

巳亥歲感事

正聞青犢起葭萌又報黃巾犯漢營豈是將皆無上略
直疑天自棄蒼生瓜沙舊戍猶傳檄吳楚新春已廢耕
見說聖君能仄席不知誰是請長纓

過長江賈島主簿舊廳

雕琢文章字字精我經此處倍傷情身從謫宦方沾祿
才被槌埋更有聲過縣已無曾識吏到廳空見舊題名
長江一曲年年水應爲先生萬古清

途中感懷寄青城李明府

鱗鬣摧殘志未休壯心翻是此身讐併聞寒雨多因夜
不得鄉書又到秋耕釣舊交吟好憶雪霜危棧不堪愁
如何只是三年別君著朱衣我白頭

和進士張曙聞雁見寄

斷行哀響逝相催爭趁高秋作恨媒雲外關山聞獨去
渡頭風雨見初來也知偷塞寒須別莫戀蘋汀暖不迴
試向富春江畔過故園猶合有池臺

鸚鵡洲卽事

悵望春襟鬱未開重吟詩法作臨鸚鵡益堪哀曹瞞尚不能
容物黃祖何曾解愛才幽鳥暖聞燕雁去曉江晴覺蜀
波來何人正得風濤便一點輕帆萬里迴

赤壁懷古

漢室河山鼎勢分勤王誰肯顧元勳不知征伐由天子
唯許英雄共使君江上戰餘陵是谷渡頭春在草連雲
分明勝敗無尋處空聽漁歌到夕曛

春夕

紀事有旅懷二字

水流花謝兩無情送盡東風過楚城胡蝶夢中家萬里
杜鵑集作子規枝上月三更故園書動經年絕華髮春唯滿
鏡生自是不歸歸便得五湖烟景有誰爭

過繡嶺宮

在驪山

古殿春殘綠野陰上皇曾此駐泥金三城帳屬昇平夢
一曲鈴關悵望心苑路暗迷香輦絕繚垣秋斷艸烟深
前朝舊物東流在猶爲年年下翠岑

張蠙

全唐詩話云字象文唐末登第尉櫟陽避亂入
蜀蜀王時爲金堂令徐后遊大慈寺見壁間題

唐詩苑華卷之十
云墻頭細雨垂纖艸水面回風聚落花問寺僧
僧以蠙對乃賜霞光牋令寫詩以進蠙進二百
首衍善之召為知制誥宋光嗣以蠙輕忽傲物
遂止卒于官蠙生穎秀幼有單于臺詩曰白日
地中出黃河天外來為世所稱○藝文志云詩

集二卷

錢唐夜讌留別郡守

四方騷動

一作亂

一州安夜列樽罍伴客歡箏策調高山

閣迥蝦蟆聲促策濤寒屏間珮響藏歌妓幕外刀光立

從侍

一作

官沉醉不愁歸棹遠晚風一作曉帆吹上子陵灘

長安春望

明時不敢臥烟霞又見秦城換物華殘雪未銷雙鳳闕
新春已發五侯家甘貧祇擬長絨才調集作酣酒忍病猶期
疆採花故國別來桑柘盡十年兵踐策西涯

宴駙馬宅

牙香禁樂鎮相攜日日君恩降紫泥紅藥院深入半醉
綠楊門掩馬頻嘶座中古物多仙意壁上新詩有御題
別向庭廡置吟石不教宮妓踏成蹊

邊情

窮荒始得靜天驕又說天兵擬渡遼聖主尚嫌蕃界近
將軍莫恨漢庭遙艸枯朔野春難發冰結河源夏半銷
惆悵臨戎皆効國豈無人似霍嫖姚

贈九江太守

江頭蹙駐木蘭船漁父來誇太守賢三邑旋添新戶口
四營漸廢舊戈鋌笙歌不似經荒後禮樂猶如未戰前
昨日西亭從遊騎信旗風裏說詩篇

贈李司徒

承家拓定隴關西勲貴名應上將齊金庫夜聞龍甲冷
玉堂秋閉鳳笙低歡筵每怨嬌娥醉閑櫪猶驚戰馬嘶
長怪魯儒頭枉白不親弓劍覓丹梯

王鐸

新唐書云字昭範會昌初擢進士第累遷右補
闕集賢殿直學士歷中書舍人禮部侍郎拜御

史中丞以戶部侍郎判度支由禮部尚書進同
中書門下平章事加門下侍郎尚書左僕射超
拜司徒尋以檢校左僕射出爲宣武節度使僖
宗初以左僕射召鄭畋數言其賢復拜門下侍
郎平章事乾符六年賊破江陵諸將觀望不進
朝廷議置統帥鐸因請自率諸將督群盜帝卽
以鐸爲侍中荆南節度使諸道行營都統封晉
國公所舉將李係兵潰貶太子賓客分司東都
未幾召拜太子少師從天子入蜀拜司徒門下
侍郎平章事加侍中復以太子太保平章事是
時誅討大計悉屬高駉駉內幸多難數偃蹇而

外逗撓鐸感慨王室每入對必噫嗚流涕固請
行時中和二年也乃以檢校司徒中書令爲義
成節度使諸道行營都統判延資戶部租庸等
使率衛兵泊梁蜀師三萬壁壘屋移檄天下先
是諸將雖環賊莫肯先及鐸檄至號令殷然士
氣皆起爭欲破賊故巢戰數蹙宦人田令孜策
賊必破欲使功出于已乃搆鐸于帝罷爲檢校
司徒以義成節度還屯鐸功危就而讒奪然卒
因其勢困賊後數月復京師策勳居關東諸鎮
第一四年徙義昌節度使鐸世貴出入裘馬鮮
明妾侍且衆過魏樂彥禎子從訓心利之李山
甫導以詭計使伏兵高雞泊劫之鐸及家屬吏
佐三百餘人皆遇害朝廷微弱不能治其冤天
下痛之

謁梓潼張惡子廟

盛唐聖主解青萍欲振新封濟順名夜雨龍拋三尺匣
青雲鳳入九重城時僖宗幸蜀人情術劔門喜氣隨雷
動玉壘韶光待賊平惟報關東諸將相柱天功業賴陰

兵紀事云時僖宗解
劔贈神故公賦詩

李山甫

全唐詩話云咸通中數舉進士被黜依魏府樂
彥禎幕府因樂禍且怨中朝大臣導彥禎子從

訓伏兵殺王鐸劫其家嘗有詩云勸君莫用誇
頭角夢裏輸贏總未真譏執政也巢寇之亂翰
林待詔王遨者北遊在鄴山甫遇於道觀謂曰
幽蘭綠水可得聞乎遨應命奏之曲終潛然曰
憶在咸通玉亭秋夜供奉至尊不意流離至此
也山甫賦詩曰幽蘭綠水耿清音嘆惜先生在
用心世上幾時曾好古人前何必獨霑襟句未
成山甫亦自黯然悲其不遇也一本云情知此
事少知音自是先生枉用心世上幾時曾好古
人前何必更霑襟致身不似笙簧巧悅耳寧如
鄭衛淫三尺絲桐七條線子期師曠兩沉沉○

藝文志云集一卷賦二卷王遨按耳目
記作王敬傲

上元懷古

南朝天子愛風流盡守江山不到頭總是戰爭收拾得
却因歌舞破除休堯行一作將道德終無敵秦把金湯可
自由試問繁華何處有雨苔烟艸石城秋

貧女

平生不識繡衣紀事作羅裳閑把金釵亦一作益自傷鏡裏只
應諳素貌人問多自信紅粧當年未嫁還憂老終日求
媒卽道狂兩意定知無說處暗垂珠淚濕蠶筐

寓懷

萬古交馳一片塵思量名利孰如身長疑好事皆虛事

却恐閑人是貴人老逐少來終不放辱隨榮後直須勻
勸君不用誇頭角夢裏輸贏總未真郝天挺云山甫落
鬼不羈拙于身謀

薄怨當路
故有是作

寒食

柳帶東風一向斜春陰澹澹蔽人家有時三點兩點雨
到處十枝五枝花萬井樓臺疑繡畫九原珠翠鼓吹作
松柏

似烟霞年年今日誰相問獨臥長安泣歲華

又

風烟放蕩花披猖鞦韆女兒飛短牆繡袍馳馬拾才調
集作
遺翠錦袖鬪雞喧廣場天地氣和融霽色池臺日暖
燒春光自憐塵土無他事空脫荷衣泥醉鄉

隋隄柳

曾傍龍舟拂翠華至今凝恨倚天涯但經春色還秋色
不覺楊家是李家背日古陰從北朽逐波疎影向南斜
年年只有晴風便遙爲雷塘送雪花

方干隱居

嘍咬嘍嘍水禽聲露洗松陰滿院清溪畔印沙多鶴跡
檻前題竹有僧名問人遠岫千重意對客閑雲一片情
早晚塵埃得休去且將書劔事先生

兵後尋邊

千里烟沙盡日昏戰餘燒罷閉重門新成劔戟皆農器
舊著衣裳盡血痕卷地朔風吹白骨挂天青氣泣幽魂

自憐長策無人問羞戴儒冠傍塞垣

又

旗頭指處見黃埃萬馬橫馳鷲翅迴劒戟遠腥凝血在
山河先暗陣雲來角聲惡殺悲于哭鼓勢爭強怒若雷
日暮却登寒壘望飽鴟清嘯伏屍堆

又

風怒邊沙逆鐵衣胡兒胡馬正驕肥將軍對陣誰教
戰士辭營不道歸新血濺紅粘蔓草舊骸堆白映寒暉
胸中縱有銷兵術欲向何門說是非

公子家

曾是皇家幾世侯入雲高第照神州柳遮門戶橫金鎖
花擁絃歌咽畫樓錦袖妬姬爭巧笑玉銜驕馬索閑遊
麻衣酷獻平生業醉倚春風不點頭

又

柳底花陰壓露塵瑞烟輕罩一團春鴛鴦占水能嗔一作
欺客鸚鵡嫌籠解罵人驪鬣似龍隨日換輕盈如燕逐
年新不知買盡長安笑活得蒼生幾戶貧

牡丹

邀勒春風不早開衆芳飄後上樓臺數苞仙艷火中出
一片異香天上來曉露精神妖欲動暮烟情態恨成堆
知君也解相輕薄斜凭闌干首重回

送職方王郎中吏部劉員外自太原鄭相公

幕繼奉徵書歸省署

雙鳳銜書次第飛玉皇催促列仙歸雲開日月臨青瑣
風卷烟霞上紫微蓮影一時空儉府蘭香同處撲堯衣
此生長掃朱門者每向人間夢粉闈

賀邢州盧員外

紫泥飛詔下金鑾列象分明世仰觀北省諫書藏舊艸
南宮郎署握新蘭春歸鳳沼恩波暖曉入鴛行瑞氣寒
偏是此生棲息者滿衣零淚一時乾

胡駢

紀事云唐末進士也

經費拾遺舊隱

林下茅齋已半傾九華幽徑少人行不將冠劍為榮事
只向烟蘿寄此生松竹漸荒池上色琴書徒立世間名
白楊風起秋山暮時復哀猿啼一聲

褚載

紀事云字厚之登乾寧進士第○藝文志云詩

三卷

贈道士

簪星曳月下蓬壺曾見東臯種白榆六甲威靈藏瑞檢
五龍雷電遶霜都惟教鶴探丹丘信不使人窺太乙爐
聞說葛陂風浪惡許騎青鹿從行無

杜荀鶴

唐詩英華卷七二十

全唐詩話云荀鶴有詩名號九華山人大順初擢第授翰林學士主客外郎知制誥序其文為唐風集或曰荀鶴牧之微子也牧之會昌末自齊安移守秋浦時年四十四所謂使君四十四兩佩左銅魚者也時妾有姪出嫁長林鄉正杜筠而生荀鶴擢第年四十六矣○高棟云字彥之池州人

時世行

夫因兵死守蓬茅麻苧裙衫鬢髮焦桑柘廢來猶納稅田園荒盡尚征苗時挑野菜和根煮旋斫生柴帶葉燒任是深山更深處也應無計避征徭

又

八十老翁住破村村中牢落不堪論因供寨木無桑柘為黠鄉兵絕子孫還似平寧徵賦稅未曾州縣略安存至今雞犬皆星散日落西山哭倚門

舟行即事

年少鬚鬢雪欲侵別家三日幾多心朝隨賈客憂風色夜逐漁翁宿葦林秋水鷺飛紅蓼晚暮山猿叫白雲深重陽酒熟茱萸紫却向江頭倚棹吟

冬末同友人泛瀟湘

殘臘泛舟何處好最多吟興是瀟湘就船買得魚偏美踏雪沽來酒倍香猿到夜深啼嶽麓雁知春近到一作別

衡陽與君剽採江山景裁取新詩入帝鄉

山中寄詩友

山深長恨少同人覽景無時不憶君庭果自從霜後熟
夜才調集作野猿頻向屋邊聞琴臨秋水彈明月酒向東山
酌白雲仙桂算攀攀合得平生心力盡於文

秋宿臨江驛

南來北去二三年年公年來兩鬢斑舉世盡從愁裏老
誰人肯向死前閒漁舟火影寒歸浦驛路鈴聲夜過山
身事未成歸未得聽猿鞭馬入長安

題覺禪和

少見脩行得似師茅堂佛像亦隨時禪衣補後雲藏線
夏臘高來雪印眉耕地戒侵連塚土伐薪教護帶巢枝
有時問著經中事却道山僧總不知

春日山居寄友人

才調集作春日
閒居寄先達

野吟何處最相宜春景暄和好入詩高下麥苗新雨後
淺深山色晚晴時半巖雲脚風牽斷平野花枝鳥踏垂
倒載干戈是何日近來麋鹿欲相隨

懷廬嶽舊隱

一別三年長在夢夢中時躡石稜層泉聲入野方堪聽
山色逢秋始可登巖鹿慣隨鋤藥叟溪鷗不怕洗苔僧
人間有許多般事求要身閒直未能

高蟾

高棟云河朔人按唐登科記進士有兩高蟾則
僖宗乾符二年登第者是也○藝文志云乾寧
紀事御史中丞詩一卷

長門怨

天上何勞萬古春君前誰是百年人
魂銷尚愧金爐燼思起猶慚玉輦塵
烟翠薄情攀不得星茫浮艷採無因
可憐明鏡來相向何似恩光朝夕新

姚

揆

從詩法錄入

潁州客舍

素琴孤劔尚閑遊誰共芳樽話唱酬
鄉夢有時生枕上客情終日在眉頭
雲拖雨脚連天去樹夾河聲遶郡流
回首帝京歸未得不堪吟倚夕陽樓

嚴

郾

藝文志云詩二卷

望夫山

何代提戈去不還獨留形影白雲間
肌膚銷盡雪霜色羅綺點成苔蘚斑
江燕不能傳遠信野花空解妬愁顏
近來豈少征人婦笑採蘼蕪上北山

盧尚卿

紀事云僖宗中和二年登第於蜀

東歸

九重丹詔下塵埃深鎖文闈罷
選才桂樹方教遮月長

杏園終待隔年開自從玉帳論兵後不許金門諫獵來
今日灞陵橋上過門人應笑臘前回紀事云咸通十一年以龐勛盜據徐州久屯成卒連年飛輓物力方虛因詔權停科舉一年是歲尚卿至闕聞詔而回乃賦是詩

蘇廣文

夜歸華山因寄幕府

山村寥落野人稀竹裏衡門掩翠微溪渡夜隨明月入
亭臯春伴白雲飛一作歸嵇康懶慢仍耽酒范蠡逋逃又
拂衣汀畔數鷗閑不起只應知我已忘機

春日遇田明府焦山人

陶公歸隱白雲溪買得春泉灌藥畦夜靜林間風虎嘯
月明竹上露禽棲陳倉邑吏驚烽火太白山人訝鼓鼙

相見只言秦漢事武陵溪裏艸萋萋

自商山宿陶令隱居

文苑英華作處一詩

聞說桃源堪避秦幽尋數月不逢人烟霞洞裏無雞犬
風雨林間有鬼神黃公石上三芝秀陶令門前五柳春
醉臥白雲閑入夢不知何物是吾身

周朴

藝文志云朴稱處士詩二卷紀事云唐末詩

人寓於閩中於僧寺假丈室以居不飲酒茹葷
塊然獨處諸僧晨粥卯食朴亦攜巾盂廁諸僧
下畢食而退率以為常郡中豪貴設供率施僧
錢朴亦巡行拱手各丐一錢有以三數錢與者

朴止受其一得千錢以備茶藥之費將盡復然
僧徒亦未嘗厭也性喜吟詩尤尚苦澁每遇景
物搜奇抉思日旰忘返苟得一聯一句則忻然
自快嘗野逢一負薪者忽持之且厲聲曰我得
之矣樵夫矍然驚駭掣臂棄薪而走遇遊徼卒
疑樵者爲偷兒執而訊之朴徐告卒曰適見負
薪因得句耳卒乃釋之有一士人以朴僻于詩
句欲戲之一日跨驢于路遇朴在傍士人乃歛
帽掩頭吟朴詩云禹力不到處河聲流向東朴
聞之忿遽隨其後且行士但促驢而去略不回
首行數里追及朴告之曰僕詩河聲流向西何
得言流向東士人領之而已閩中傳以爲笑又
云黃巢至福州求得朴問曰能從我乎荅曰我
尚不仕天子安能從賊巢怒斬之○歐陽脩詩
話云唐之晚年詩人無復李杜豪放之格然亦
務以精意相高如周朴者構思尤艱每有所得
必極其雕琢故時人稱朴詩月鍛季煉未及成
篇已播人口其名重當時如此而今不復傳矣
余少時猶見其集其句有云風暖鳥聲碎日高
花影重又云曉一作晚來山鳥鬧雨過杏花稀誠
佳句也

桐栢觀

東南一境清心目有此千峰插翠微人在下方衝月上
鶴從高處破烟飛巖深水落寒侵骨門靜花開色照衣
欲識蓬萊今便是更於何處學忘機

春日秦國懷古

荒郊一望欲消魂涇水縈紆傍遠村牛馬放多春艸盡
原田畊破古碑存雲和積雪蒼山晚烟伴殘陽綠樹昏
數里黃沙行客路一作路客不堪回首思秦原

哭李端

高棟云此詩疑非周村之作

三年剪拂感知音哭向青山永夜心竹在曉烟孤鳳去
劔荒秋水一龍沈新墳日落松聲小舊宅春殘草色深
不及此時親執紼石門遙想淚沾襟

登福州南澗寺

萬里重山遶福州南橫一道見溪流天邊飛鳥東西沒
塵裏行人蚤晚休曉日青一作春山當大衆連雲古壑對
高樓那堪望斷他鄉目一作外一作客只此蕭條自白頭

唐詩英華卷十七終

唐詩英華卷十八目錄

友人
靳應昇 孫永祚
沈捷 魏允栒 叅輯

晚唐八



吳融 三十六首

韓偓 四十首

曹松 四首

劉兼 十七首

盧弼 三首

鄭準 三首

鄭渥 一首

吉師老 一首

王貞白 三首

李中 十九首

唐球 二首

唐詩英華卷十八目錄終

唐詩英華卷十八

吳江顧有孝茂倫編

晚唐八



吳融

新唐書云字子華越州山陰人融學自力富辭
調龍紀初及進士第韋昭度討蜀表掌書記遷
累侍御史坐累忝官流浪荆南依成汭久之召
為左補闕以禮部郎中為翰林學士拜中書舍
人昭宗反正御南闕群臣稱賀融最先至于時
左右歎駭帝有指授疊十許藁融跪作詔少選
成語當意詳帝咨賞良厚進戶部侍郎鳳翔劫

遷融不克從
太客闈鄉俄
召還翰林遷
承旨卒
官○藝文志云詩集四卷又制誥一卷

太保中書令軍前新樓

十二闌干壓錦城
半空人語落灘聲
風流近接平津閣
氣色高含細柳營
盡日卷簾江艸綠
有時欹枕雪峰晴
不知奉詔朝天後
誰此登臨看月明

秋日經別墅

別墅蕭條兼上村
偶期蘭菊與琴尊
檐橫碧嶂秋光近
樹帶寒一作潮
晚色昏幸有白雲眠
楚客不勞芳草思
王孫北山移去前
文在無復教人嘆曉猿

金橋感事

郝天挺云金橋
雒陽橋名也

太行和雪疊晴空
二月郊原尚朔風
飲馬早聞臨渭北
射鵰今欲過關山一作東
百年徒有伊川嘆
五利寧無魏絳功
日暮長亭正愁絕
悲笳一曲戍烟中

彭門用兵後經汴

一作路
郝天挺云彭門即
徐州也咸通末龐

勛反徐州為
康承訓所破

長亭一望一徘徊
千里關河百戰來
細柳舊營猶鎖月
祁連新塚已封苔
霜飛一作綠野愁無際
燒接黃雲慘不開
若比江南更牢落
子山詞賦莫興哀

又

隋隄風物已淒涼
隄下仍多舊戰場
金鏃有苔人拾得
蘆花一作無主鳥銜將
秋聲暗促河聲急
野色遙連日

色黃獨上寒城正愁絕戍鼓驚起雁行行

廢宅

風飄碧瓦雨摧垣却有隣人為一作與鎖門幾樹好花開

一作虛白晝滿庭芳一作荒艸易黃昏放魚池涸蛙爭開一作

聚棲燕梁空雀自喧不獨淒涼眼前事咸陽一火便成

原鼓吹作變寒原

登漢州城樓

雨餘秋色拂孤城遠目凝時萬象清疊翠北來千嶂盡
漫流東去一江平從軍固有荊州樂懷古能無峴首情
欲下關干一回首鳥歸帆沒戍烟明

富春

水送山迎入富春一川如畫晚晴新雲低遠渡帆來重
潮落寒沙鳥下頻未必柳間無謝客也應花裏有秦人
巖光萬古清風在不敢停橈更問津

新安道中翫流水

一渠春碧弄潺潺密竹繁花掩映間看處便須終日住
算來寧得此身閒縈紆似接迷人洞清冷應連一作隣有
雪山上却征車更回首了然塵土不相關

紅樹

一聲南雁已先紅槭槭淒淒葉葉同自是孤根非暖地
莫驚他木耐秋風燒烟散去陰全薄明月臨來影半空
長憶洞庭千萬樹照山橫浦夕陽中

浙東筵上有寄

襄王席上一神仙眼色相當語不傳見了又休真似夢
坐來雖近遠於天隴禽有意猶能說江月無心也解圓
更被東風助惆悵落花時節蝶翩翩

富水驛東楹有人題詩

筆跡柔媚
出自纖指

繡纓霞翼兩鴛鴦金島銀川是故鄉只合雙飛便雙死
豈悲相失與相忘烟花夜泊紅蕖膩蘭渚春遊碧艸芳
何事遽驚雲雨別秦山楚水兩乖張

書懷

傍巖依樹結簷楹夏物蕭疎景更清灘響忽高何處雨
松陰自轉一峰鼓吹作此山晴見多隣犬遙相認來慣幽禽

近不驚爭得

鼓吹作敢便誇饒勝事九衢塵裏免勞生

憶釣舟

青山小隱枕潺湲一葉垂綸幾泝泂後浦春風隨興去
南塘秋雨有時眠慣衝曉霧驚群雁愛颭殘陽入亂烟
迴首無人寄惆悵九衢塵土困揚鞭

宋玉宅

艸白烟寒半野陂臨江舊宅指遺基已懷湘浦招魂事
更憶高唐說夢時穿逕早曾聞客住登墻豈復見人窺
今朝送別還經此吟斷當年幾許悲

送知古上人

昔年離別浙河東多難相逢舊楚宮振錫纔尋三逕艸

登船忽挂一帆風幾程村飯添盃白何處山花照袖紅
不似投荒憔悴客滄浪無際問漁翁

禁直偶書

玉皇新復五城居仙館詞臣在碧虛錦砌漸看翻芍藥
鎖窓還詠碧蟾蜍敢期林上靈鳥語貪草雲間彩鳳書
爭奈滄浪頻入夢白波無際落紅蕖

送弟東歸

偶持麟筆侍金闈夢想三年在故溪祖竹定欹簷雪折
稚杉應拂凍雲齊謾勞筋力趨丹鳳可有文詞詠碧雞
此別更無他事囑北山高處謝猿啼

送友赴闕

故人歸去指翔鸞樂帶離聲可有歡驛路兩行秋吹惡
渭波千疊夕陽寒空郊已曠周禾熟舊苑應尋漢火殘
遙羨從公無一事探花先醉曲江干

憶猿

翠微雲斂日沈空叫徹青冥怨不窮連臂影垂秋色裏
斷腸聲盡月明中靜飄烟峽淒淒雨高弄霜天嫋嫋風
猶有北山歸意在少驚佳樹近房櫳

新雁

湘浦春波始北歸玉關搖落又南飛數聲飄去和秋色
一字橫來背晚暉紫閣高翻雲羃羃潮川低渡雨微微
莫從思婦臺邊過未得征人萬里衣

憶山泉

穿雲落一作石細湔湔盡日一作杳杳疑聞弄管絃千仞灑

來寒碎玉一泓深一作處碧涵天烟迷葉亂尋難見月

好風清聽不眠春雨正多歸未得只應流恨更潺湲

葉落

紅影飄來翠影微一辭林表不知歸伴愁無色烟猶在

替恨成啼露未稀若逐水流應萬里莫因風起便孤飛

楚郊千樹秋聲急日暮紛紛惹客衣

春雨

霏霏漠漠暗和春暮翠凝紅色更新寒入膩裘濃曉睡

細隨油壁靜香塵連雲似織休迷雁帶柳如啼好贈人

別有空堦寂寞事綠苔狼籍落花頻

和陸拾遺題諫院松

落落孤松何處尋月華西畔結根深曉含仙掌三清露

晚上宮墻百雉陰野鶴不歸應有怨白雲高太無心

碧巖秋澗休相望捧日元須在禁林

還俗尼

本是歌妓

柳眉梅額倩時新笑脫袈裟得舊身三峽却為行雨客

九天曾是散花人空門付與悠悠夢寶帳迎回暗暗春

寄語江南徐老說一生長短託清塵

上陽宮辭

苑路青青半是苔翠華西去未知回景陽春漏無人報

太液秋波有雁來，素影可堪明月照。紅顏無奈落花催，誰能賦得長門事，不惜千金奉酒杯。

春晚書懷

落盡紅芳春意闌，綠蕪空鎖辟疆園。嫦娥斷影霜輪冷，帝子無蹤露竹繁。未達東林還絕想，不勞南浦更消魂。晚來誰共殘鶯約，爭奈風淒又雨昏。

杏花

粉薄紅輕掩淚羞，花中占斷得風流。軟非因醉都無力，疑不成歌亦自愁。獨照影時臨水畔，最含情處出牆頭。徘徊盡日難成別，更待黃昏對酒樓。

分水嶺

兩派潺湲不暫停，嶺頭長瀉別離情。南隨去馬通巴棧，北逐歸人達涪城。澄處好窺雙黛影，咽時堪寄斷腸聲。紫溪舊隱還如此，清夜梁山月更明。

子規

舉國繁華委逝川，羽毛飄蕩一年年。他山叫處花成血，舊苑春來艸似烟。雨閣不離濃綠樹，月斜長弔欲明天。湘江日暮聲淒切，愁殺行人歸去船。

春歸次金陵

春陰漠漠覆江城，南國歸橈趁晚程。水上驛流初過雨，樹籠隄去不離鶯。迹疎冠蓋兼無夢，地近鄉園自有情。便被東風動愁思，楊花千里雪中行。

關西驛亭卽事

晚霞零落雨初收
關上危闌獨悵留
千里好春聊極目
五陵無事莫回頭
山猶帶雪霏霏恨
柳未禁寒冉冉愁
直是無情也腸斷
鳥歸帆沒水空流

東歸次瀛上

暖烟輕澹草霏霏
一片晴山襯夕暉
水露淺沙無客泛
樹連疎苑有鶯飛
自從身與滄浪別
長被春教寂寞歸
回首青門不知處
向人楊柳莫依依

偶書

青牛關畔寄孤村
山當屏風石當門
古樹綠陰連蔽芾
長河飛浪接崑崙
苔田綠後蛙爭聚
麥隴黃時雀更喧
只此無心更無事
避人何必武陵源

卽事

抵鵲山前寄揜扉
更甘鼓吹作便堪終老脫朝衣
曉窺清鏡千峰入
暮倚長松獨鶴歸
雲裏引來泉脉細
雨中移得藥苗肥
何須一筴鱸魚膾
始挂孤帆問釣磯

韓偓

新唐書云字致光京兆萬年人擢進士第佐河中幕府召拜左拾遺以疾解後遷累左諫議大夫宰相崔胤判度支表以自副王溥薦爲翰林學士遷中書舍人韓全誨等劫帝西幸偓夜追及鄆見帝慟哭至鳳翔遷兵部侍郎進承旨忤

朱全忠貶濮州司馬帝執其手流涕曰我左右
無人矣再貶榮懿尉徙鄧州司馬天祐二年復
召爲學士還故官偃不敢入朝挈其族南依王
審知而卒○藝文志云詩一卷又香奩一作集
一卷金鑾密記五卷○紀事云偃小字冬郎字
致堯今日致光誤矣自元玉山樵人○筆叢云
香奩集沈存中尤延之並以爲和凝作凝少日
作此詩後貴盛嫁名韓偃不欲自沒故於他文
中見之今其詞與韓不類蓋或然也方氏律髓
以偃同時吳融有和偃無題詩爲証不知此正
凝假托之故不然何以弗托之溫韋諸子而托
之偃葉少蘊以爲韓熙載則姓與事皆近之總
之俱五代耳葉以不當見唐志爲疑此不然唐
志如羅隱韋莊劉昭禹皆五代人也

避地寒食

避地淹留已自悲况逢寒食欲沾衣殘春孤館人愁坐
斜日空園花亂飛路遠漸憂知己少時危又與賞心違
一名所繫無窮事爭敢當年便息機

春盡

惜春連日醉昏昏醒後衣裳見酒痕細水浮花歸別澗
斷雲含雨入孤村人間易得芳時恨地迥難招自古魂
慚愧流鶯相厚意清晨猶爲到西園

苑中

上苑離宮處處迷相風高與露盤齊金塔鑄出後貌立
玉柱雕成翡翠啼外使調鷹初得按五方外使以鷹隼
初調習使能禽獲
謂之中官過馬不教嘶上乘馬必中官馭笙歌錦繡雲
得按霄裏獨許詞臣醉似泥

與吳子華侍郎同年玉堂伴直懷昔叙懇因

成長句兼呈同年

往年鶯谷接清塵今日鰲山作侍臣二紀計偕勞筆硯
一朝宣入掌絲綸予與子華俱
久困名場聲名烜赫文章士金紫
雍容富貴春絳帳恩深無路報語餘相聚却酸辛

小隱

借得茅齋嶽麓西擬將身世老鋤犁清晨向市烟含郭
寒夜歸村月照溪爐為窓明僧偶坐松因雪折鳥驚啼
靈椿朝菌由來事却笑莊生始欲齊

贈易卜崔江處士

白首窮經通秘義青山養老度危時門傳組綬身能退
家學樵漁跡更一作奇四象盡聞龜策妙九霄堪嘆鶴
書遲壺中日月將何一作焉一作用借與閑人試一窺

殘春旅舍

旅舍殘春宿雨晴恍然心地憶咸京樹頭蜂抱花鬚落
池面魚吹柳絮行禪伏詩魔歸淨域酒衝愁陣出奇兵
兩梁郝天挺云漢制
秩千石冠兩梁免被塵埃汚拂拭朝簪待眼明

唐詩英華卷六十一

秋村

稻壠蓼紅溝水清
荻園葉白秋日明
空陂路細見騎過
遠田人靜聞水行
柴門狼籍牛羊氣
竹塢幽深鷄犬聲
絕粒看經香一炷
心知無事卽長生

再止廟居

公值秋風來值春
前時今日共銷魂
頽垣古栢疑山觀
高柳鳴鴉似水村
萊甲未齊初出葉
樹陰方合掩重門
幽深凍餒皆推分
靜者還應爲討論

重過曲江

追尋前事立江汀
漁者應聞太息聲
避客野鷗如有感
損花微雪似無情
疎林自覺長隄在
春水空連古岼平

惆悵引人還到夜
鞭鞘風冷柳烟輕

早發藍關

關心愁立候鷄鳴
搜景馳魂入杳冥
雲外日隨千里雁
山根霜共一潭星
路盤暫見樵人火
棧轉時聞驛使鈴
自問辛勤緣底事
半年驅馬傍長亭

寄湖南從事

索寞襟懷酒半醒
無人一爲解餘醒
岸頭柳色春將盡
船背雨聲天欲明
公國正悲同旅雁
隔江可忍更啼鶯
蓮花幕下風流客
試與溫存譴逐情

卜隱

屏跡還應減是非
却憂藍玉又光輝
桑梢出舍蠶初老

柳絮葢溪魚正肥世亂豈容長愜意景清還覺易忘機
世間華美無心問藜藿克腸苧作衣

寄隱者

烟郭雲高路不遙懷賢猶恨太迢迢長松夜落釵千股
小港春添水半腰已約病身拋印綬不嫌門徑是漁樵
涓濱晦跡南陽臥若比吾徒更寂寥

中秋禁直

星斗疎明禁漏殘紫泥封後獨憑闌露和玉屑金盤冷
月謝珠光貝闕寒天襯樓臺歸苑外風吹歌管下雲端
長卿只爲長門賦未識君臣際會難

途中經野塘

世亂他鄉見落梅野塘晴暖獨徘徊船衝水鳥飛還止
袖拂楊花去又來季重舊遊多喪逝子山新賦極悲哀
眼看朝市爲陵谷始信昆明有劫灰

惜花

皺白離情高處切膩紅愁態靜中深眼隨片片泔流去
恨滿枝枝被雨侵總得苔遮猶慰意一作若教泥污更
傷心臨階一盞悲春酒明日池塘是綠陰

半醉

水向東流更不迴紅顏白髮遍相催壯心暗逐高歌盡
往事空成半醉來雲護雁霜籠淡月雨憐鸞曉落殘梅
西樓悵望芳菲節處處斜陽艸似苔

三月

辛夷纔謝小桃發踏青過後寒食前四時最好是三月
一去不迴惟少年吳國地遙江接兼漢陵魂斷艸連天
新愁舊恨知無奈須就隣家甕底眠

午睡夢江外兄弟

長夏居閑門不開遶門青董絕塵埃空庭日午獨眠覺
旅夢天涯相見迴鬢向此時應有雪心從到處一作別後即
成灰如何水陸三千里幾月書郵始一來

秋郊閑望有感

楓葉微紅近有霜碧雲秋色滿吳鄉魚衝駭浪雪鱗健
鴉閃殘陽金背光心為感恩長慘慼鬢因經亂蚤蒼浪
可憐廣武山前事楚漢寧教作戰場

安貧

手風慵轉八行書眼暗休尋九局圖窻裏日光飛野馬
按頭筠管長蒲蘆謀身拙為安蛇足報國危曾捋虎鬚
舉世可能無默識未知誰復一作擬試齊竽

贈僧

盡說歸山避世塵幾人終肯別囂氛銜添澗水盛將月
衲掛松枝惹得雲三接舊承前席遇一靈今用戒香熏
相逢莫話金鑿事觸撥傷心不忍聞

翫水禽

在湖南醴陵縣時作

兩兩珍禽渺渺溪翠衿紅掌淨無泥向陽眠處莎成毯

踏水飛時浪作梯，依倚離梁輕社燕。抑揚金距笑晨雞，
勸君細認漁翁意，莫遣緼羅悞穩棲。

過臨淮故里

交遊昔歲已凋零，第宅今來亦變更。舊廟荒涼時享絕，
諸孫饑凍一官成。五湖竟負他年志，百戰空垂異代名。
榮盛幾何流落久，遣人懷抱薄浮生。

傷亂

岸上花根總倒垂，水中花影幾千枝。一枝一影寒山裏，
野水野花清露時。故國幾年猶戰鬪，異鄉終日見旌旗。
交親流落身羸病，誰在誰亡兩不知。

鵲

偏承雨露潤，毛衣黑白分明。衆所知高處，營巢親鳳閣。

一作

靜時閑

一作

語上龍墀化爲金印，新祥瑞飛向銀

河舊路岐，莫怪天涯棲不穩。託身須是萬年枝。

禁中作

銀臺直北金鑾外，暑雨初晴皓月中。惟對松篁聽刻漏，
更無塵土翳虛空。綠香熨齒金盤果，清冷侵肌水殿風。
坐久忽聞鈴索動，玉堂西畔響丁東。

代小玉家爲蕃騎所虜後寄集賢裴公相國
動天金鼓逼神州，惜別無心學墜樓。不得迴眸辭傅粉，
便須含淚對殘秋。折釵伴妾埋青塚，半鏡隨郎葬杜郵。
惟有此宵魂夢裏，殷勤相覓鳳池頭。

春盡日

已下十一首
係香奩集詩

樹頭春日昭窓簷樹底蕙花夜雨露外院池亭聞動鎖
後堂闌檻見垂簾柳腰入戶風斜倚榆莢墜牆水半淹
把酒送春惆悵在年年三月病厭厭

青春

眼意心期卒未休暗中終擬約秦樓光陰負我難相遇
情緒牽人不自由遙夜定嫌香蔽膝悶心應弄玉搔頭
櫻桃花謝梨花發腸斷青春兩處愁

橫塘

秋寒灑背入簾霜鳳脰燈青照洞房蜀紙麝煤沾筆典
越甌犀液發茶香風飄亂點更籌轉拍送繁絃曲破長
散客出門斜月在兩眉愁思問橫塘

咏浴

再整魚犀攏翠簪解衣先覺冷森森教移蘭燭頻羞影
自試香湯更怕深初似洗華難抑按終憂沃雪不勝任
豈知侍女簾帷外賸取君王幾餅金

倚醉

倚醉無端尋舊約却憐惆悵轉難勝靜中樓閣深春雨
遠處簾櫳半夜燈抱柱立時風細細繞廊行處思騰騰
分明窓下聞裁剪敲遍闌干喚不應

晝寢

碧桐陰靜隔簾櫳扇拂金鵝玉篔烘撲粉更沾香體滑

解衣唯見下裳紅
煩襟乍觸冰壺冷
倦枕徐欹寶髻鬆
何必苦勞魂與夢
王昌只在此墻東

閨情

癸酉年在南安縣作

輕風滴磔動簾鈎
宿酒猶酣嬾卸頭
但覺夜深花有露
不知人靜月當樓
何郎燭暗誰能咏
韓壽香焦亦任偷
敲折玉釵歌轉咽
一聲聲作兩眉愁

有憶

晝漏迢迢夜漏遲
傾城消息杳無期
愁腸帶酒入千里
淚眼倚樓天四垂
自笑計狂多獨語
誰憐夢好轉相思
何時斗帳濃香裏
分付東風與玉兒

裏娜

丁卯年作

裏娜腰肢淡薄粧
六朝宮樣窄衣裳
著詞暫見櫻桃破
飛盞遙聞荳蔻香
春惱情懷身覺瘦
酒沾顏色粉生光
此時不敢分明道
風月應知暗斷腸

多情

庚午年在桃林場作

天遣多情不自持
多情兼與病相宜
蜂偷野蜜初嘗處
鶯啄含桃欲咽時
酒蕩襟懷微駮駮
春牽情緒更融怡
水香剩置金盆裏
瓊樹長須浸一枝

偶見

千金莫惜早蓮生
一笑從教下蔡傾
仙樹有花難問種
御香聞氣不知名
愁來自覺歌喉咽
瘦去誰憐舞掌輕
小疊紅牋書恨字
與奴方便送卿卿

曹松

藝文志云字夢徵天復進士第杪書郎詩集三卷○紀事云舒州人學賈司倉為詩天復初杜德祥主文放松及王希羽劉象柯崇鄭希顏等及第年皆七十餘時號五老榜

南象旅次

憶歸休上越王臺歸思臨高不易裁為客正當無雁處故園誰道有書來城頭早角吹霜盡郭外殘潮帶月迴心似百花間未得年年爭發被春催

陪湖南李中丞瑋宴隱溪

竹林啼鳥不知休一作羅列飛橋水亂流觸散柳絲迴

玉勒約開蓮葉上蘭舟酒邊舊侶真何遜雲裏新聲是莫愁若值主人嫌晝短應陪秉燭夜深遊

江西逢僧省文

高僧不負雪峰期却伴青霞入翠微七百集作葉巖前霜欲降九枝松上鶴初歸風生碧澗魚龍躍威振金樓燕雀飛想得白蓮花上月滿山猶帶舊光輝

別湖上主人

門繫釣舟雲滿津借君幽致坐移旬湖村夜叫白蕪雁菱市曉喧滾浦人遠水日邊重作雪寒林曉際別生春不辭更住醒還醉太乙東峰歸夢頻

劉兼

唐詩英華卷十七

征婦怨

金閨寂寞罷妝臺玉筯闌干界粉腮花落掩關春欲暮
月圓欹枕夢初迴鸞膠豈續愁腸斷龍劍難揮別緒開
曾寄錦書無限意塞鴻何事不歸來

夢歸故園

桐葉飛霜落井欄菱花藏雪助衰顏夜牕颯颯搖寒竹
秋枕迢迢夢故山臨水釣舟橫葦岸隔溪禪侶啓柴關
覺來依舊三更月離緒鄉心起萬端

春晝醉眠

朱欄芳草綠纖纖欹枕高堂捲畫簾處處落花春寂寂
時時中酒病厭厭寒鴻信斷雖堪訝梁燕詞多且莫嫌

自有卷書銷永日霜華未用鬢邊添

春怨

繡林紅坼落花鈿故去新來感自然絕塞杪春悲漢月
長林深夜泣湘絃錦書雁斷應難寄菱鏡鸞孤貌可憐
獨倚畫屏人不會夢魂纔別戍樓邊

秋夕書事

搖落江天萬木空雁行斜戛塞垣風征閨搗月離愁遠
舊館眠雲旅夢通郢客豈能陪下里臯禽爭冒戀樊籠
此心曠蕩誰相會一作許盡在南華十卷中

春夕遣懷

窮通分定莫淒涼且放懽情入醉鄉范蠡扁舟終去相

馮唐半世只爲郎風飄玉笛梅初落酒泛金樽月未央
休把虛名撓懷抱九原丘壠盡侯王

貴遊

繡衣公子宴池塘淑景融融萬卉芳珠翠照天春未老
管絃臨水日初長風飄柳線金成穗雨洗梨花玉有香
醉後不能離綺席擬憑青帝繫斜陽

仲春宴遊

二月風光似洞天紅英翠萼簇芳筵楚王雲雨迷巫峽
江令文章媚蜀箋歌黛久顰春岫斂舞衣新繡曉霞鮮
酒闌香袂初分散笑指漁翁釣暮烟

江畔獨步

醉卓寒筇傍水行漁翁不會獨吟情龜能顧印誰相重
鶴偶乘軒自可輕簪組百年終長物文章千古亦虛名
是非得喪皆閑事休向南柯與夢爭

登樓寓望

憑高多是偶沈瀾紅葉何堪照病顏一作紅葉何堪照病顏萬疊
雲山供遠恨一軒風物送秋寒背琴鶴客歸松徑橫笛
牛童卧蓼灘獨倚郡樓無限意夕陽西邁一作水東邊

一作漫漫

新竹

近牕臥砌兩三叢佐靜添幽別有功影鏤碎金初透月
聲敲寒玉乍搖風無憑費叟烟波碧莫信湘妃淚點紅

自是子猷偏愛爾虛心高節雪霜中

春晚閑望

東風滿地是梨花只把琴心帶酒家立處晚樓橫短笛
望中春草接平沙雁行斷續晴天遠燕翼參差翠幕斜
歸計未成頭欲白釣舟烟浪思無涯

寄酬滑州文秀大師

分飛屈指十三年齒齒峰前別社蓮薄宦偶然來左蜀
孤雲何事在南燕一封瑤檢音初達兩處金沙色共圓
珍重湯休惠佳句郡齋吟久不成眠

登郡樓書事

偶奉綸書蒞旭川郡樓嘉致盡依然松欹鳥道雲藏寺

月滿漁舟水浸天望帝古祠花簇簇錦城歸路草芊芊
有時倚檻垂雙袂故國風光似眼前

郡樓閒望書懷

郡城樓閣遶江濱風物清秋入望頻銅鼓祭龍雲塞廟
蘆花飄市雪粘人蓮披淨沼羣香散鷺點寒烟玉片新
歸去杜陵池館在且將朝服拂埃塵

春宵

春雲春日共朦朧滿院梨花半夜風宿酒未醒珠箔卷
艷歌初闕玉樓空五湖范蠡才堪重六印蘇秦道不同
再取素琴聊假寐南柯靈夢莫相通

新蟬

唐詩英華卷之二十

齊女幌幃失舊容侍中冠冕有芳蹤翅翻晚鬢尋香露
聲引秋絲逐遠風旅館聽時髭欲白戍樓聞處葉多紅
只知送恨添愁事誰見凌霄羽蛻功

盧弼

郝天挺云與李光遠同時有詩名

薄命妾

君恩已斷盡成空追想嬌歡恨莫窮長爲薜花光曉日
誰知團扇送秋風黃金買賦心徒切清路飛塵信莫通
閒凭玉欄思舊事幾回春暮泣殘紅

聞鴈

秋風蕭瑟靜埃氛邊鴈迎風響咽群瀚泉應嫌霜下早

湘川偏愛艸初薰蘆洲宿處依沙岍榆塞飛時度晚雲
何處最添羈客恨竹窗殘月酒醒聞

秋夕寓居精舍書事

葉滿苔階杵滿城此中多恨恨難平疎簷看織蟻蛸網
暗室愁聽蟋蟀聲醉臥欲拋羈客思夢歸偏動故鄉情
覺來獨步長廊下半夜西風吹月明

鄭準

藝文志云字不欺乾寧進士第有渚宮集一卷

○郝天挺云嘗爲荆南從事

江南清明日

吳山楚驛四年中一見清明一改容旅恨共風連夜起

韶光隨酒著人濃延興門在建康外攀花別采石江頭帶
雨逢無計歸心何日是路邊戈甲正重重

題宛陵北樓

雨來風靜綠蕪鮮凭著朱闌思浩然人語獨耕燒後嶺
鳥飛斜沒望中烟松梢半露藏雲寺灘勢橫流出浦船
若遣謝宣城不死必應吟盡夕陽川

寄進士崔魯範

往陽才子舊交知別後干戈積詠思百戰市朝千里夢
三年風月幾篇詩山高雁斷音書絕谷背鶯寒變代遲
會待路寧歸得公酒樓漁浦重相期

鄭渥

塞上

出門何處問西東指畫翻爲語論同到此客頭潛覺白
未秋山葉已飄紅帳前影落傳書雁日下聲交失馬翁
早晚回鞭復南去大衣高蓋漢鄉風

雜陽道

客亭門外路東西多少喧騰事不齊楊柳惹鞭公子醉
紵麻掩淚魯人迷通宵塵土飛山月是處經營夾御隄
頃刻知音幾存歿半回依約認輪蹄二詩從樂府詩集錄入

吉師老

詩見才調集

看蜀女轉昭君變

妖姬未著石榴裙自道家連錦水濱檀口解知千載事

清詞堪歎九秋文翠眉嘖處楚邊月畫卷開時塞外雲
說盡綺羅當日恨昭君傳意向文君

王貞白

詩法云字有道乾寧二年張貽憲榜進士○藝
文志云詩一卷○紀事云貞白唐末大播詩名
御溝爲卷首云一派御溝水綠槐相蔭清此波
涵帝澤無處濯塵纓鳥道來雖險龍池到自平
朝宗心本切願向急流傾自謂冠絕無瑕呈僧
貫休休曰世好只是剩一字貞白揚袂而去休
曰此公思_敏書一字於掌中逡巡貞白迴忻然
曰已得一字云此中涵帝澤休將掌中字示之

一同天祐年中內試貞白札翰狼籍帝覽拂下
玉案有黃門奏此舉人有詩名御批曰麤通放

洗竹

道院竹繁教略洗鳴琴酌酒看扶疎不圖結實來雙鳳
且要長竿釣巨魚錦籜裁冠添散逸玉芽修饌稱清虛
有時記得三天事自向琅玕節下書

庾樓曉望

獨凭朱檻亦凌晨山色初明水色新竹霧曉籠銜嶺月
蘋風暖送過江春子城陰處猶殘雪衙鼓聲前未有塵
三百年來庾樓上曾經多少望鄉人

送芮尊師

唐詩英華卷六十二

石上菖蒲節節靈先生服食得長生早年避世憂身老
近日登山覺步輕黃鶴待傳蓬島信丹書應換藥宮名
他年控鯉昇天去廬岳通民願從行

李中

孟賓于集序云字有中隴西人滄陽宰也所著
五七言兼六言共二百篇目曰碧雲集

宿廬山白雲峰重道者院

絕頂松堂喜暫遊一宵玄論接浮丘雲開碧落星河近
月出滄溟世界秋塵裏年光何急急夢中強弱自悠悠
他時書劔酬恩了願逐鸞車看十洲

兼上從事秋日書懷

悠悠旅宦役塵埃舊業那堪信未迴千里夢隨殘月斷
一聲蟬送早秋來壺傾濁酒終難醉匣鎖青萍久不開
唯有按吟遣懷抱涼風時復上高臺

贈蒯亮處士

著得新書義更幽負琴何處不遨遊玄宮寄宿月華冷
羽客伴吟松月秋滿戶烟霞思紫閣一帆風雨憶滄洲
吾君側席求賢切未可懸瓢枕碧流

題廬山東寺遠大師影堂

遠公遺跡在東林往事名存動苦吟杉檜已依靈壇老
烟霞空鏤影堂深入簾輕吹催香印落石幽泉雜磬聲
十八賢人消息斷蓮池千載月沉沉

廬山詩集卷之二十一

江邊吟

風暖汀洲吟興生
遠山如畫雨初晴
殘陽影裏水東注
芳艸烟中人獨行
閃閃酒帘招醉客
深深綠樹隱啼鶯
盤桓漁舍忘歸去
雲靜高空月又明

竹

森森移得自山莊
植向空庭野興長
便有好風來枕簟
更無閒夢到瀟湘
塵來蘇砌經疎雨
引下溪禽帶夕陽
閒約羽人同賞處
安排碁局就清涼

秋江夜泊寄劉鈞正字

閒憶詩人思倍勞
維舟清夜泥風騷
魚龍不動澄江遠
烟霧皆收皎月高
潮滿釣舟迷浦嶼
霜繁野樹叫猿猱
此時吟苦君知否
雙鬢從他有二毛

贈胸山孫明府

縣庭無事似山齋
滿砌青青旋長苔
閒撫素琴曹吏散
自烹新茗衆僧來
買將病鶴勞心養
移得閒花用意栽
幾度訪君留我醉
甕香皆值酒新開

再遊洞神宮懷邵羽人有感

重向烟蘿省舊遊
因尋遺跡想浮丘
松頭鶴去三清遠
壇畔月明千古秋
泉落小池清復咽
雲從高嶠起還收
自慚未得冲虛術
白髮無情漸滿頭

經古觀有感

古觀寥寥枕碧溪
偶思前事立殘暉
漆園化蝶名空在

柱史猶龍公不歸丹井泉枯苔鏤合醮壇松老鶴來稀
回頭因歎浮生事夢裏光陰疾若飛

象城秋夕寄懷舍弟

鳥棲庭樹夜悠悠枕上誰知淚暗流千里夢魂迷舊業
一城砧杵擣殘秋窻間寂寂燈猶在簾外蕭蕭雨未休
早晚萊衣同著公免悲流落在邊州

和夏侯秀才春日見寄

綿蠻黃鳥不堪聽觸目離愁怕酒醒雲散碧山當晚檻
雨催青蘚匝春庭尋芳嬾向桃花塢垂釣空思杜若汀
晝夢不成吟有興揮毫書在枕邊屏

下蔡春暮旅懷

柳過清明絮亂飛旅中懷抱獨悽悽月生淮上雲初散
家在江南夢亦迷髮白每慚青鑑啓心孤長怯子規啼
拜章爲養慈親急願向明朝捧紫泥

登毗陵青山樓

高樓閒上對晴空豁目開襟半月中千里吳山青不斷
一邊遼氣浸無窮人生歌笑開花露世界興亡落葉風
吟罷倚闌何限意回頭城郭暮烟籠

題吉水縣廳前新栽小松

剷開幽澗蘚苔斑移得孤根植砌前影小未遮官舍月
翠濃猶帶舊山烟群花解笑香寧久衆木雖高節不堅
輸我婆娑闥檻內晚風蕭颯學幽泉

悼懷王喪妃

花綻花開事可驚
暫來浮世返蓬瀛
楚宮夢斷雲空在
雒浦神歸月自明
香解返魂成浪語
膠能續斷是虛名
音容寂寞春何處
誰會樓中獨立情

吉水縣依韻酬華松秀才見寄

官况蕭條在水村
吏歸無事好論文
枕欹獨聽殘春雨
夢去空尋五老雲
竹逕每憐和藪步
禽聲偏愛隔花聞
詩情冷淡知音少
獨喜江臯得見君

送圖上人歸廬山

蓮宮舊隱塵埃外
策杖臨風拂袖還
踏雪獨尋青嶂下
聽猿重入白雲間
蕭騷紅樹當門老
斑駁蒼苔鎖逕閒

預想松軒夜禪處
虎溪圓月照空山

思湓渚舊居

昔歲曾居湓水頭
艸堂吟嘯興何幽
迎僧嘗踏竹間蘚
愛月獨登溪上樓
寒翠入櫺嵐岫曉
冷聲縈枕夜泉秋
從拘官路無由到
昨夜分明夢去遊

唐球

紀事云球為詩撚藁為圓納之大瓢中後臥病
投瓢于江曰斯文苟不沉沒得者方知吾苦心
爾至新渠有識者曰唐山人瓢也接得之十纜
二三又云球生于唐末至性純慤篤好雅道放
曠疎逸邦人謂之唐隱居或云王建帥蜀召為

叅謀不就今以其故居爲隱居寺○北夢瑣言
云球詩思遊歷不出二百里

贈僧詩見芳亭客說

曾聞半偈雪山中貝葉翻時理盡通般若嘗添持戒力
落義誰算念經功雲間曉月應難染兼上虛舟自信風
長說滿庭花色好一枝紅是一枝空

題青城觀

數里緣山不厭難爲尋真訣問黃冠苔鋪翠點山橋滑
松織香梢古道寒晝傍綠畦孳嫩玉夜開紅竈燃新丹
孤鐘已斷泉聲在風動瑤花月滿壇

唐詩英華卷十八終

